

# MABULU MATOBWANI



Nkolo, nandimi; Nkolo, nandimi,  
Nyonso ekobonga; Nkolo nandimi.

<sup>2</sup> Totikala naino mwa moke ndenge totelemi pe togumba motó. Nkolo Yesu, na ndenge na biso ya komikitisa, tozali komeka kotalisa Yo, na loyembo oyo, ete tondimi. Pe tobondeli, Nkolo, ete sikawa, Ókoba kokabolela biso Lipa na Bomoi, kopesa biso oyo tosengeli na yango, uta na Liloba na Yo. Mpamba te tosengi yango na Nkombo na Yesu. Amen.

<sup>3</sup> Bokoki kofanda. Nayebi malamú, soki tosengeli, soki nakoki koloba liloba oyo ekoká na yango moko ya “amen,” ete mapamboli minene ya Nzambe ekokóba kozala likolo na eyanganelo oyo.

<sup>4</sup> Na ntongo, nafandaki pe nazalaki kolanda liyangani na bokebi, nasepelaki na matatoli, na elobeli ndenge na ndenge oyo moko na moko azalaki na yango. Pe koyoka bandimi ya sika, ndeko mo-Batiste oyo, oyo ayaki kosenga bolimbisi ndenge azalaki kokanisa mwa mabe. Boye, na—nasepelaka mpenza na bomoto, moto oyo azali mpenza na bomoto, to—to pe oyo azali mpenza mobali, soki amoni ete asali libunga. Asengaki mpenza bolimbisi epai na ngai te, azalaki kosenga bolimbisi epai na ngai te, ezalaki nde epai na Nzambe. Boye, na—nasepeli na yango, bomoni. Nzambe apambola ndeko na biso, pe ndeko na ye mopalanganisi ya Nsango Malamú.

<sup>5</sup> Oh, mo-batiste yango, boyebi, ngai moko pe nazaláká na lingomba Batiste. Nazaláká mondimi na Eglise Baptiste Missionnaire. Soki nakómi epai bato bazali, nayebaka ndenge bomiyokaka. Ngai pe nazalaki komiyoka bongo, ete natondisami na eloko moko oyo na—nayebaki te.

<sup>6</sup> Namikaniseli mbala na ngai ya liboso oyo namonaki bapantekotiste, ezalaki na Dowagiac, na Michigan. . . Bolimbisa ngai, nautaki na Dowagiac mpo na kolóba mbisi, pe nazalaki kozonga longwa na Dowagiac, kino na Indiana. Bongo namonaki bakomaki “Yesu” likolo na mituka pe biloko nyonso, pe nalandaki mateya na bango ya mokolo yango. Na mokolo oyo elandaki, babengisaki ngai na etumbelo, mpo na koloba mwa maloba, pe nasalaki yango. Pe ngai. . . Batunaki ngai soki nasambelaka wapi, pe nayebisaki bango ete nazali Batiste.

<sup>7</sup> Na mpokwa wana, mobange moko ya moindo nde alingaki koteya, azalaki mosika te na mibu ntuku libwa, pe ayaki na etumbelo. Mobange yango, basengelaki kosunga ye mwa moke mpo ámata wana. Azalaki, alataki kazaka moko ya batei, ya molai, ya nkingo ya velúr, ná mwa molongo ya suki ya pembe ebele na pembeni-pembeni ya motó na ye. Pe nakanisaki:

“Mibali pe bato ya likindo ebele boye, bato minene, ndenge nini batiki liteya oyo épesama na moto ya boye? Ee, mobange oyo asengelaki kofanda na kiti na esika moko boye, kofanda.”

<sup>8</sup> Na mokolo yango, bazalaki koteya likolo na makambo oyo Yesu asaláká awa na mokili. Pe, kasi ye ayaki, azuaki liteya na ye, nabanzi atangaki na Yobo . . . :7, 20, nayebi lisusu te soki ezalaki mpenza Likomi yango. Ata bongo, ekomami boye, to mwa ndambo na yango: “Yo ozalaki wapi ntango Natiaki miboko na mokili, ntango minzoto ya ntongo ezalaki koyemba elongo, pe bana na Nzambe bazalaki koganga na esengo?” Pe alobelaki makambo oyo esalemaki na Likolo, na ntango oyo bamosusu bautaki kolobela makambo oyo esalemaki na mokili.

<sup>9</sup> Pe na esika moko, miníti soko mitano nsima na ye kobanda koloba, ye, Molimo na Nkolo esimbaki ye, pe apumbwaki likolo mpenza pe atutisaki matíndí na ye. Oh, esika ezalaki monene, etumbelo oyo mbala soko mibale; pe akitaki na nse, alobaki: “Esika ezali moke na etumbelo oyo mpo ngai náteya.”

<sup>10</sup> Ee, na eleko wana, nazalaki na mibu soko ntuku mibale. Namilobelaki: “Soki—soki ekómi boye mpo na mobange wana, ekozala ndenge nini mpo na ngai?” Boye bomoni?

<sup>11</sup> Ekozala malamau ete makambo nyonso ézala na alimá mpenza mpo na bandeko na biso ya sika, mpo tóyamba bango mpenza kati na bondeko na biso. Namoni, nabanzi balobaki na ntina na sánzó moko oyo afandi awa, nakanisi; ya solo, lokola bazali ba-Irlandais, bato ya libota na biso bazali ba-Katoliko. Na bongo, mibale to misato mosusu bazalaki, ba-Batiste ná bamosusu. Bokokaki kozua mwa mobulu, eleki mwa ntango moke. Namoni ata ndeko moko alobeli yango te, kasi nakanisaki ete námeke kosembola yango. Ntango Ndeko Shakarian... Ntango molobi malamau oyo atondaki mpenza na esengo, ya koyeba ete Boyei na Nkolo ekómi mpenza pene, a—alobaki na monoko na sika, oyo biso toyebi te. Pe tozali na balimboli oyo balimbolaka. Kútu, Liloba elobi: “Soki molimboli azali te, báfanda kimia.” Kasi soki—soki balobi na minoko na sika, na nsima balimboli yango, ekómi lisakoli. Nde epesaki mwa mobulu ya—ya bato mibale na mbala moko. Nzoka nde, ezalaki mobulu ata moke te, bomoni; mpamba te, moko na bango azalaki kolimbola, mosusu azalaki kosakola. Bomoni? Boye, ezali . . .

<sup>12</sup> Nakanisaki kosala ete bandeko na biso basosola, soki basosolaki te, mpamba te moko na bango, na ndenge elongobani, azalaki kopesa . . . Boyebaki ntango boni moko na moko azuaki? Pe oyo mosusu atondisamaki mingi, ye moko, na lolenge ete Molimo na Nzambe azalaki kosakola na nzela na moko mpamba; kolimbola, oyo mosusu azalaki kolimbola. Mpo ézala polele, mpo bino . . . tozali te . . . Mbala mosusu, mpo na makanisi ya bato . . . Lokola ndeko na biso ya motuya, oyo asengi bolimbisi na ntongo oyo. Ekopesa mwa mobulu na moto oyo asosoli te. Kasi mpo

na bato oyo bazali na kati ya likambo yango, babundi ya kala na etumba oyo tozali kati na yango, ee, tososoli yango, ndenge makambo yango ezali. Boye, nakanisaki kaka ete nálobela yango mwa moke, soki ezalaki mabe te.

<sup>13</sup> Sikawa, na—nayebi ete oyo ezali esika malamú ya kolobela yango te. Kasi lokola bato nyonso balobi mwa makambo, ngai. . . Boyebi, mobali wana alobaki, mobange moindo wana alobaki, “esika ezali moke mpo ngai náteya.” *Ntango* pe ezali moke mpo ngai náteya. [Losambo babeti maboko—N.D.E.] Nalobaka mwa mingi.

<sup>14</sup> Mobali moko alobaki mokolo moko, alobaki: “Motei moko ayaki, azalaki mokengeli na lingomba mibu ntuku mibale. Pe azalaki ntango nyonso koteya miníti ntuku misato mpenza, mikolo nyonso ya lomingo na ntongo na losambo na ye.” Pe alobaki: “Mokolo ya lomingo oyo na ntongo, ateyaki ngonga misato.”

<sup>15</sup> Na bongo, likita ya basungi babengisaki ye, pe balobaki: “Mokengeli, tosepelaka na yo mingi.” Balobaki: “Toyebaka ntango nyonso ete—ete ozuaka ngámbo ya Biblia pe ya makokí na Yango.” Balobaki lisusu: “Osembolaka biso ntango nyonso mpo tózala peto pe mpembe liboso na Nzambe. Tosepelaka na yo mingi, pe tondimi ete ozali mosali na Nzambe. Tosepelaki mpenza na liteya ya ntongo ya lelo. Kasi,” balobaki, “tozali na likambo moko mpamba, oyo tolingi kotuna yo.” Balobaki: “Toyebi ntango boni ozuaki, mpo tozali likita ya basungi.” Balobaki: “Mikolo nyonso ya lomingo na ntongo, ozuaka mpenza miníti ntuku misato, kasi lelo ozui ngonga misato.” Balobaki: “Sikawa, yeba ete, tosepeli na yango na mobimba mpenza. Ezalaki malamú.” Bazalaki koluka kokitisa motema ya mobange yango, boyebi.

<sup>16</sup> Alobaki: “Ee, bandeko, boyoka ndenge esalemaka.” Alobaki: “Na ntongo nyonso, ntango nakendaka na. . . ntango babengaka ngai na eteyelo,” alobaki, “natiaka mwa Bombó oyo Eswaka na monoko,” alobaki, “pe nafibaka yango.” Pe alobaki: “Soki Bombó yango esili,” alobaki, “ezuaka mpenza miníti ntuku misato,” pe alobaki, “bongo, natiki koteya.” Alobaki: “Boyebi, na ntongo ya lelo, namonaki ete nalekisaki ntango mwa moke. Nabwakaki yango, nazalaki nde na butó na monoko na ngai.” [Losambo baseki—N.D.E.]

<sup>17</sup> Ngai nakotia eloko na monoko te, na bongo tobanzi ete tozali na babutó na mabenga na biso te. Kasi tozali. . . Nabanzi ete yango ezali lisoló ya kotúka te. Kasi ngai. . . Boyebi, ata Nzambe pe alingaka kosekisa, boyebi.

<sup>18</sup> Na bongo, tozongisi matondi mingi ndenge tozali awa pe tozui ntango oyo ya bondeko, pe—pe libaku malamú ya kokabola lisusu Lipa na Bomoi, na mwa lolenge na ngai ya komikitisa. Nayebi, lokola bato na likindo, ndenge mobali oyo autaki na

Angletére alobaki awa lobi na mpokwa; oh, nayiná kotelema nsima na moto ya ndenge wana, ná mwa mayele na ngai ya mibu nsambo mpamba na kelasi. Kasi nabanzi ete Nzambe akolimbolela bino ntina oyo ezali na motema na ngai. Bomoni? Soki maloba na ngai ezali malamau te, na—natii motema ete bamposa na ngai ezali malamau.

<sup>19</sup> Sikawa totanga kati na Makomi. Mingi kati na bino balingaka kolanda. Pe na ntongo oyo nakotanga, mpo na mwa ntango, na Buku ya Yilimiya, mosakoli, mokapo ya 2, pe nakobanda sikawa na molongo ya 1.

*Liloba na Yawe eyelaki ngai ete,*

*Kenda pe ganga na matoi na Yelusaleme ete, Yawe alobi boye ete, nazali kokanisa boboto na bolenge na yo, pe bolingo na ntango na kobalana na yo, wana otambolaki nsima na ngai kati na lisobe.*

*Yisalaele abulisamaki mpo na Yawe, oyo na liboso euti na kofuluka na ye; nyonso baoyo balei ye. . . pe bazalaki na likambo, mabe ekwelaki bango; Yawe alobi bongo.*

*Boyoka liloba na Yawe, e ndako na Yakobo, pe bikolo nyonso na ndako na Yisalaele:*

*Yawe alobi boye ete, Batata na bino bazui mabe nini epai na ngai ete balongwi mosika na ngai pe babili makambo na mpamba pe bayei bobele mpamba?*

*Balobi pe te ete, Yawe azali wapi? Ye oyo abutisaki biso longwa na mokili na Ezipito pe atambolisaki biso kati na lisobe, kati na moikili na bisika bikaoki pe na mabulu, kati na mokili mozangi mai pe na elilingi na kufa, kati na mokili wana moto azalaki kolekaleka te pe moto afandi. . . te.*

*Nakómisaki pe bino kino mokili pelamoko elanga na mbuma, ete bolia mbuma na yango pe malamau na yango; kasi ekotaki bino, bobebisaki mokili na ngai pe boyeisaki libulu na ngai eloko eboyami.*

*Banganga balobaki te ete, Yawe azali wapi? Pe baoyo bazalaki kosimbaka malako bayebaki ngai te; babateli basalaki mabe liboso na ngai, basakoli balobaki na nkombo na Bala pe batambolaki nsima na makambo na mpamba.*

*Yawe alobi boye ete, Bongo. . . nakowelana na bino pe na bana na bana na bino nakowelana lokola.*

*Zambi. . . kino mabongo na Kitimi pe bomona, botinda epai na Kedala pe bososola malamau, botala soko likambo lokola oyo ezalaki liboso.*

*Libota moko bakotikaka nde banzambe na bango? Nde bazalaki banzambe. . . te. Kasi bato na ngai batikaki nkembo na bango mpo na yango ezali mpamba.*

*E likolo, okamwa na likambo oyo, ozala na nsomo mingi, . . . olengalenga. Yawe alobi boye.*

*Zambi bato na ngai basali masumu mibale, batiki ngai, liziba na mai na bomoi, pe bamitimoleli mabulu, mabulu matobwani, makosimbaka mai te.*

<sup>20</sup> Tika Nkolo ábakisa mapamboli na Ye na botangi ya Maloba na Ye. Pe nakosepela ko—kobenda uta na yango liteya na nkombo, ya, *Mabulu Matobwani*.

<sup>21</sup> Ntango totangi Likomi oyo na ntongo oyo; boye, Makomi nyonso euti na molimo. Pe toyaka na Ndako na Nkolo mpo na kosembolama pe kososola. Pe mbala mingi tokutanaka na ba . . . mwa makambo ya ndenge na ndenge na nzela.

<sup>22</sup> Lokola sodá oyo, eleki mwa ntango, oyo auti kosolola na biso pe alobaki ete biloko mosusu, oyo ntango mosusu ekoki kozala na ekólo mosusu oyo ezali na misíle moko boye, to—to eloko moko ya ndenge wana, pe biso tosengeli kosala eloko mosusu mpo na kotelemela yango na—na mayele ya basodá.

<sup>23</sup> Ee, likambo yango pe esalemaka na lingomba, to na ndakonzambe epai moto azali koteya, to soki azali mopalanganisi Nsango Malamu, na elanga. Soki amoni bato kotomboka, likambo moko, oyo euti kobanda, kosalema, na ebandeli na yango, to likambo nini, ezali likambo ya moto yango, soki azali mosali na Nzambe, ete ástukisa likambo yango wana, ékota na makanisi ya bato te, mpo bákota na likambo yango te. Tolingi te ete ésalema, ete tókóta na bisika ya ndenge wana.

<sup>24</sup> Bongo, na eleko ya Yilimiya awa, lisakoli na ye, elekaki mibu pene na ntuku motoba uta liwa ya—ya Yisaya—Yisaya. Pe basalaki mibu pene na ntuku motoba kozanga mosakoli ya monene. Habakuku ná basakoli mosusu ya mike bazalaki, kasi Yisaya azalaki mosakoli ya monene oyo ya suka. Pe libota, na eleko yango, bazalaki na moto mpo na kobimisa bango te, batangwaki. Nzoka nde, bazalaki libota ya Nzambe, batangwaki kino na ezaleli oyo—oyo tomoni bango na yango, ntango Yilimiya ayaki kosakola mpo na bango. Yilimiya pe azalaki . . . Asakolaki liboso bákende na mboka mopaya, ye pe akendeke na mboka mopaya elongo na bango.

<sup>25</sup> Na nsima, na ntembe te, Danyeke nde ayaki nsima na Yilimiya. Pe Danyeke alobaki ete asosolaki, na nzela ya Makomi, mibu ntuku nsambo oyo basengelaki kozala kuna.

<sup>26</sup> Ya solo, mosakoli mosusu azalaki kati na bango, oyo alingaki kosala ete mokumba yango, ntango alataki yango na nkingo na ye, ete elingaki kozala likambo ya moke, ete: “Kati na mibu mibale, ee, Nzambe alingaki kozongisa bango nyonso,” kasi Yilimiya ayebaki yango malamau. Pe toyebi likambo ekómelaki mosakoli oyo asakolaki lokuta, akufaki na mobu yango kaka. Boye, Nzambe alingaki te ete áumela.

27 Lisusu, tomoni pe bizaleli ya bato na eleko yango. Bongo, nalingi te bósosola ngai mabe (na—nakáni moto te) na oyo nakáni koloba awa, Makomi moke pe maye nabongisi.

28 Kala nazalaki na ntina te ya—ya kokoma biteni ya Makomi ná makambo mosusu oyo nakosalela. Kasi nsima na ngai kolekisa mibu ntuku mibale na mitano mbala ya mibale, ee, na—nakóma kobosana mingi, boye, nakóma kokoma biteni ya Makomi mpo náyeba, uta na yango, epai nazali kokende. Lisusu, napesaka ntango mingi na kobondela mpo na babeli, pe makambo mosusu, ná mibembo, na lolenge ete nazalaka mpenza na ntango ya koyekola ndenge esengeli te.

29 Sikawa, kasi mosakoli monene oyo, ya eleko wana, ezalaki nde Yilimiya, pe azalaki mosakoli monene lokola Amosa ná basakoli mosusu mingi, oyo bazalaki. Atungisamaki mingi ntango amonaki bizaleli ya ekólo. Nzoka nde, bisika ezalaki . . .

30 Ntango mosusu soki olobi na ntina na ekólo, moto akoki kokanisa ete ozali kolobela e—etonga moko boye. Ezali bongo te. Ezali nde elilingi ya ekólo na mobimba. Pe tozali komona, lelo, e—ezaleli ya lelo ekómi mpenza lokola oyo ezalaki na eleko ya Yilimiya, ete ekólo yango moko, na mobimba, emikotisi, tóloba, kati na losambo ya bikeko; lokola, nakoki koloba, ete etangwaki mosika na Nzambe. Pe lokola ekómaki bongo, ezali nde bolembu ya eteyelo. Mpamba te, soki eteyelo etelemaki kaka ngwi, na Liloba na Nzambe, Nzambe alingaki kozala na mangomba nyonso ndenge Azali kosala awa epai na biso. Kasi bamemi bato mosika na yango. Pe yango nde likambo na—nalingi kolobela na ntongo ya lelo. Bongo, tomoni ete ezali mpenza likambo oyo ezali kosalema mpenza kati na bileko nyonso.

31 Nabanzi ezalaki Amosa, oyo nauti kolobela, nde alobaki ete azali “mosakoli te, mwana na mosakoli pe te.” Kasi alobaki ete: “Soki nkosi angulumi, nani akobanga te?”

32 Pe soki moto moko asílá koyoka nkosi mpenza konguluma na lisobe, baoyo boyokaka awa na kati ya ndako ya bibende, balelaka bobele lokola baniáwu. Kasi soki nkosi angulumi na lisobe, biloko nyonso esalaka keba. Ngai nasílá kolala na zamba, na bokila ya nkosi. Azali mokonzi ya banyama, pe, soki nkosi angulumi, ata banyama ya mikemike batikaka makelele, biloko nyonso. Ba—ba—bambulú ná—ná bikange oyo basalaka makelele, ná banyama mosusu, ná makelele ya bankéma ná bamakáku, na banyama ya mikemike, okoki koyoka makanisi na yo malamumu te; kasi na mosika, soki nkosi angulumi, banyama ya mikemike nyonso ekotika makelele. Bomoni, banyama nyonso babangaka ye. Nzoka nde, banyama mingi ezali oyo ekoki koboma ye, kasi ayebani lokola mokonzi kati na banyama.

33 Alobaki: “Soki nkosi angulumi, nani akobanga te?” Alobaki: “Boye, Nzambe alobi, nani akosakola te?”

<sup>34</sup> Pe yango nde, nakanisi, ezaleli oyo esengeli pe mpo na m'ondengé ya lelo. Nzambe alobi. Bomoni? Pe tozali komona nkómá na etutú, boye ekómi mpenza pete mpo na kosakola pe komona ete tokómi na ntango na suka.

<sup>35</sup> Pe tozali komona Nzambe, uta na biteni nyonso ya bibongiseli, uta mosika na Katolicisme, koleka na mangomba nyonso ya m'isioni, ya Buddha pe ya bamosusu, uta na Inde, pe bikólo mosusu. Azali kobenga libota na Ye ete básangana, Azali kosangisa bango. Pe na—nazali na esengo monene mpo na yango, ya komona ete mokolo yango ezali koya. Sikawa biso. . . Ezali—ezali mokolo monene, moko na matómba oyo eleki minene.

<sup>36</sup> Yango wana, soki nasengelaki, soki nayebaki, liboso ete mokili ézala, ntango tozalaki naino milimo kati na Nzambe, ezali bongo, mpamba te tozalaki elongo na Ye liboso na kozalisama na mokili. Mpamba te, lolenge ya Bomoi na Seko ezali bobele moko, ezali nde Nzambe. Pe tozali eteni na Ye. Elingi koloba te ete tokokaki koyeba pe—pe kokanisa, pe ete tozalaki bato mpenza; kasi tozalaki kati na makanisi na Ye, ya oyo biso tozalaki, liboso na kozalisama na mokili. Mpamba te, tozali eteni na Ye, ndenge mwana na ngai ya mobali azali eteni na ngai, pe ngai nazali eteni ya tata na ngai, pe bongo na bongo. Tozali bana na Nzambe ya mibali ná ya basi, na boyebi na Ye liboso.

<sup>37</sup> Pe na eleko wana, soki nazalaki na boyebi oyo nazali na yango lelo, pe soki nakokaki kotambusa miso likolo na etando mobimba ya ntango, pe soki Alobaki na ngai: “Olingi kobika na eleko nini?” Nalingaki koloba na eleko oyo ya lelo, oyo ezali liboso mpenza na—na suka ya lisolo ya mokili, pe liboso na Bokonzi na Nzambe oyo ekómi pene na kotiamana na mabelé. Nabanzi ete ezali eleko oyo eleki bileko nyonso na nkembo, ezali eleko oyo.

<sup>38</sup> Tomoni awa ete mosakoli afundi Yisalaele, nsima na Nzambe kobulisa ye pe kotinda ye. Afundi bango mpo na masumu mibale ya minene. Tolingi kolobela makambo mibale oyo basaláká. Pe, uta na yango, tolingi kokende liboso na nzéla na yango. Nzoka nde, bapesaki Nzambe mokongo, Ye Liziba ya mai na bomoi, pe bamitimolelaki mabulu. Bapesaki mokongo na eloko oyo Nzambe apesaki bango, pe bamitimolelaki eloko oyo bango moko basalaki. Pe mabulu yango, bótala, yango, ezalaki ya kotoboka pe ezalaki kotangisa mai.

<sup>39</sup> Nzoka nde, libulu oyo etobóká ekoki kosimba mai te. Ekotangisa mai. Ngai nakólá na elanga, pe nayebi eloko babengi libulu ya kala, pe ndenge enyokolaka bato.

<sup>40</sup> Pe libulu oyo etangisaka mai ezali mpenza e—etaliseli malamú, nakanisi, ya eleko oyo, nyonso (oyo ya biso) oyo tomeke kosala, mpo na kosangisa bato, kosangisa mabota, kosangisa mangomba, ekómaka ntango nyonso makambo ya motó pasi. Tomeká kosala ete ba-Methodiste nyonso bákóma ba-Batiste, pe

bamoko bákóma bamosusu, ná mangomba ndenge na ndenge. Kasi ezalaki na yango kútu mwango na Nzambe te.

<sup>41</sup> Nzambe azali bobele na esika ya bokutani moko mpamba. Alobaki kuna, na Buku ya Esode, ete: “Naponi esika ya kotia Nkombo na Ngai, pe wana nde esika bobele moko oyo Nakokutana na bato.” Aponaki esika ya kotia Nkombo na Ye. Pe esika Azalaki kotia Nkombo na Ye, nde esika oyo Azalaki kokutana na Yisalaele. Azali na esika Akutanaka na lingomba na Ye na eleko oyo, pe Ye moto aponaki Nkombo yango, Nkombo yango ezali Yesu Klisto. Kuna nde esika Akutanaka na mondimi mpenza, soki azali kati na Yesu Klisto. Oyo wana nde esika Nzambe aponá ya kotia Nkombo na Ye.

Okoloba: “Nkombo ya Nzambe?”

<sup>42</sup> Alobaki: “Nayei na Nkombo ya Tata na Ngai.” Boye, oyo wana nde esika Nzambe atíá Nkombo na Ye, ezali nde kati na Klisto. Pe kati na Klisto nde esika oyo biso nyonso tokoki kokutana na nse ya Makila oyo esopanaki, pe kuna nde epai tozalaka na bondeko ya solosolo.

<sup>43</sup> Nzambe asalaki mwango na Ye na ebandeli, na elanga na Edene, nde esika oyo azalaki kokutana na bato, kasi ezalaki na lisosoli ya mayele ya bongó te; soki ezalaki bongo, Ewa alingaki kolongobana na mwango na Ye. Kasi toyebi ete ye andimaki likanisi ya mayele ya Satana: “Ya solo, Nzambe akosala yango te,” kasi Nzambe alobáká ete Akosala bongo! Na yango, Aponaki esika ya lisiko, ezalaki na nzela na Makila, kasi na nzela na likanisi ya mayele ya bongó te.

<sup>44</sup> Boye, tozali bobele kobeta mopepe, kasi ezali kaka na lolenge ya bomoto nde—nde bato balukaka ko—kosala bongo. Soki tozalaki na ntango, tolingaki kolobela yango na bolai, kasi nazali na mposa ya butó te. Boye, tokomeka kaka kokómisa yango pete mpenza, “mabulu oyo etangisaka mai.” Pe tomoni ete e—ekómi mpenza kosalema lisusu, ezali mpenza elilingi ya eleko na biso, oyo tozali kobika kati na yango, ya mitungisi nyonso oyo tozali na yango.

<sup>45</sup> Na limemia mpenza mpo na makasi nyonso oyo mosali na Nzambe nyonso azali kosala, oyo atángaka, ata kotánga, Nkombo na Yesu Klisto. Basengelaki kopesa ye lokumu, kaka mpo atángaka, ata kotánga, Nkombo na Ye na limemia pe botosi. Ná mabongisi minene ya kopalanganisa Nsango Malamu, oyo etamboli mokili mobimba, pe nyonso wana, na mikolo oyo ya suka, nabanzi, kasi tokokoka te kosala ete bato bákóma na motema moko, soki tomemi bango liboso na nse na Makila na Yesu Klisto te. Yango nde esika bobele moko epai tokoki kozala na kimia.

<sup>46</sup> Moto moko abengaki ngai eleki ntango molai te, uta kuna na ésti, pe alobaki: “Ndeko Branham, nayoki ete okómi kofanda na—na Arizona, pe obongisi e—esika moko kuna, kimia ezali



kuna.” Pe ndenge boyebi motindo Nsango yango eyaki, Nkolo ayebisaki ngai makambo oyo elingaki kosalema na Alaska, pe ndenge elingaki kosalema na Kaliforni mobimba, pe esalemaki mpenza bongo. Alobaki: “Boye, soki mabelé ekoningana, pe nyonso wana, esika ya kimia ezali wapi?”

<sup>47</sup> Nalobaki: “Esika ya kimia, oyo ngai nayebi, ezali moko mpamba. Ezali nde kati na Klisto. “Mpamba te baoyo bazali kati na Klisto, bako. . .” Yango nde esika bobele moko, oyo ngai nayebi.

<sup>48</sup> Nzoka nde, Yilimiya, bazalaki pe kobenga ye “mosakoli oyo alelaka.” Nabanzi, eloko oyo ezalaki kolelisa—kolelisa mosakoli yango, nde, ezali mpo ye, lokola mosakoli (pe Liloba na Nkolo eyaka epai na bato lokola bango), ntango azalaki komona bato kolanda bonkoko na bango, pe kokanisa ete ezalaki na yango mabe te, ye azalaki na makoki ata moke te ya kobongola bango.

<sup>49</sup> Mpamba te, bazalaki kokende sémba na mboka mopaya, mpo toyebi ete moto akobuka eloko oyo akolona, ózala nani, ózala nini. Pe biso, lokola ekólo, tobuki. . . to toloni nde, pe tosengeli kobuka. Lobi, na nsima na nzanga, soki Nkolo alingi, nakoloba likolo na *Mpasi Ya Kobota*; pe na—pe nakolobela yango kuna, ete tokoki kozanga etumbu te. Tosengeli kobuka oyo toloni.

<sup>50</sup> Pe soki Nzambe apesi biso etumbu te ndenge tobongoli Boklisto lelo, tobongoli bato pe tomemi bango na makambo ya Boklisto ya maloba, ndenge Ndeko Moore alobaki mokolo moko ete: “Na lisosoli malamau, Akotindama kosekwisa bato ya Sodoma ná Gomora, pe kosenga bango bolimbisi ndenge Azikisaki bango.” Ya solo, mpo ete Nzambe azali sembo kino lelo. Pe ndenge kozanga bosembo ekómi; ezali—ezali malamau mpo na bosantu na Ye pe ya Liloba na Ye ete Ábukisa bato eloko oyo bango moko baloni, ekozala pe bongo mpo na biso.

<sup>51</sup> Sikawa, botala ete batikaki Ye, Liziba ya mai na bomoi, pe bamitimolelaki mabulu.

<sup>52</sup> Sikawa, moto mosusu akoki kozala awa, oyo ayebi te soki libulu ezali nini. Libulu ezali ebombelo ya mai, oyo bato basali, oyo ezali koluka kozua esika ya libulu. Ezali eloko oyo bato batimoli. Bato boni bayebi eloko nini libulu? Malamau. Boye, bato mingi ya mboka bazali awa na ntongo ya lelo. Na bongo, bango. . . nazali komikanisela ndenge libulu moko ya kala ezalaki, na esika moko boye, pe nazalaki ntango nyonso kobanga mpo na komela mai na yango. Ezalaki e—ebombelo oyo bato basali. Pe bakoki kotiela yango motema ata moke te. Okoki kotiela libulu motema te.

<sup>53</sup> Nzoka nde, eloko nyonso oyo bato basali ezalaka penza malamau ntango nyonso te. Kasi kaka ndenge—ndenge Nkolo atíá ntango kati na—kati na—kati na nzela na yango, pe ndenge mabelé ebalukaka; mobu na mobu, elekaka ntango nyonso, mikolo nyonso, ngonga nyonso, pe kolála ya mói, pe ezangaka

te. Kasi ba-mótre ya malamu koleka, oyo tokoki kozala na yango, ekokóma na retár ya miníti ebele kati na sanza moko, na ntembe te. Kasi, bomoni, eloko nyonso oyo Nzambe asalaka ebongaka be, kasi oyo moto asalaka ebongaka be te. Boye, mpo na nini kondima oyo moto asali, na ntango oyo okoki kozua oyo ebongi be?

<sup>54</sup> Nalobaka yango ntango nyonso, na oyo etali biso ba-Pantekotiste. Bomoni, toyebi, pe, na ntembe te, tozali—tozali libanda na molongo ya Nzambe te, tondimi te; kasi toyebi pe ete kati na biso, tozali na bato oyo balukaka komekola baninga. Oyo wana ezali ndenge ya bato. Bamekaka kosala bongo. Basalaki bongo na Biblia: “Moko alobaki: ‘Ngai nazali moto ya Polo,’ ‘nazali moto ya Silasi,’” pe bongo na bongo. Kasi, bango, bazali koluka komekola oyo moto mosusu asalaki to azali kosala.

<sup>55</sup> Kasi mpo na nini kondima eloko ya lokuta, oyo bamekoli, na ntango oyo likolo etondi na biloko ya solosolo, na ntango oyo “elaka ezali mpo na bino pe mpo na bana na bino”? Mpo na nini kondima eloko ya ndenge mosusu? Mpo na nini kozua bindimeli to biyambweli, na ntango oyo Biblia ezali Liloba na Nzambe oyo ezangi kosangisama? Mpo na nini koluka kobakisa to kolongola, na ntango oyo Nkolo Yesu alobaki na Emoniseli 22:18: “Ye oyo akolongola Liloba na Yango moko mpamba, to akobakisa liloba moko mpamba likolo na Yango, likabo na ye ekolongolama na Buku na Bomoi”?

<sup>56</sup> Na ebandeli, ntango Nzambe atiaki bato na mokili, Alobaki na bango bábika na Liloba na Ye. Nzoka nde, Liloba na Nzambe ezali lokola moniololo, oyo bakatisaka na Yango lifelo; pe bayebaka makasi ya moniololo bobele na ekanganelo na yango, oyo ya motaú koleka, pe Nzambe alingi ete tótosa Liloba na Yango moko na moko. Nzoka nde, oyo wana ezalaki ebandeli ya Biblia; kozanga botosi na Liloba moko mpamba, ebwakaki bato kati na molili ya kufa.

<sup>57</sup> Yesu ayaki na katikati ya Biblia, pe Alobaki ete: “Moto akobika kaka na lipa te, kasi na Liloba nyonso.” Kaka ndambo na Maloba te, to ntuku libwa na libwa likolo na mokama te; kasi Liloba nyonso, lokola Ewa ná Adamu.

<sup>58</sup> Pe na suka ya Biblia, na Emoniseli 22:18, Alobi ete: “Ye oyo akolongola Liloba moko na Yango, to akobakisa Liloba moko mpamba na Yango!”

<sup>59</sup> Boye, ntina nini kokotisa makanisi ya moto kati na Yango, na ntango oyo ezali Likanisi ya Nzambe Ye moko mpo na likambo yango? Tozali na mposa ya kozua oyo Ye alobi. Ekomami pe: “Tika ete liloba ya moto nyonso ézala lokuta, pe oyo ya Ngai ézala Solo.”

<sup>60</sup> Yango nde ezalaki likambo ya mosakoli oyo. Na ntango ya Yilimiya, azalaki mosakoli, ye moto azalaki na Liloba na Yawe. Pe mobali wana azalaki koluka kokotisa eloko moko na kati na

Yango, nzoka nde bakoki kotiela yango motema te. Pe nazali sikawa kokokanisa bibombelo ya mai yango na mimesano oyo tomeki kozua, mpo ézua esika ya Liloba na Nzambe oyo ya solosolo.

<sup>61</sup> Mpamba te, eloko moko te ekoki kozua esika na Yango. Ezali Nzambe. “Na ebandeli Liloba azalaki, pe Liloba azalaki elongo na Nzambe, pe Liloba azalaki Nzambe. Bongo Liloba akómaki mosuni pe afandaki elongo na biso.” Na Baebele 13:8, elobami: “Azali ndenge moko lobi, lelo, pe libela.” Ndenge nini tokoki kolongola Yango? Esengeli kozala Solo. Azali kaka ndenge moko. Azali ndenge moko na mobeko moko moko.

<sup>62</sup> Yango nde ntina bosepelaka na Yango, bino ba-Batiste ná ba-Metodiste, pe ba-Katoliko ná ba-Presbiterien, ná bamosusu, bosepelaka na Bozali yango. Na esika moko, kati na yo, ondimá Nzambe. Ekoki kozala ntango mosusu na lolenge ya mayele ya bongó, ntango mosusu oyokaki Nguya na Nzambe, pe ozali mosali na Nzambe; kasi soki okoti mpenza kati na Nzambe, pe ososoli esika na yo kati na Ye, lokola mwana na Nzambe ya mobali to ya mwasi, yango mpenza nde ekopesa yo esengo monene, oyo Nzambe akána mpo na yo.

<sup>63</sup> Sikawa, tomoni na Malako, mokapo ya 16, ete Yesu alobaki te: “Bókende na mokili mobimba, pe—pe—pe bópesa malakisi.” Alobaki: “Bókende koteya Nsango Malamu.” Bóteya Nsango Malamu, elingi koloba, kotalisa polele Nguya ya Molimo Mosantu! “Bókende na mokili mobimba, pe bótalisa polele Nguya ya Molimo Mosantu.”

<sup>64</sup> Nazalaki kosolola ná ndeko mobali moko, moko na baoyo bapesaki mbongo ya . . . mpo na mayangani na ngai na Inde, kuna na Bombay, kino na Afrique du Sud pe na bikólo ndenge na ndenge, epai ba-misionére basiláká kopesa malakisi Yango lokola liloba moko boye to lokola mayele ya bongó. Kasi mokolo moko kati na liyangani, ntango Molimo Mosantu akitaki, Ye moko, Abikisaki bato ya mboka mpenza, nkoto ntuku misato, ntango nabengaki bato na etumbelo mbala moko mpamba, pe kaka wana, na esika oyo batelemaki. Basi oyo bazalaki wana, bazalaki mpenza bolumbu, tóloba, ndenge bazalaki ntango babotamaki, pe kaka na ntango oyo batombolaki maboko mpo na koyamba Klisto . . .

<sup>65</sup> Molimo Mosantu akitaki na esika yango pe Abikisaki bato nkoto ntuku mibale na mitano na mbala moko, batiki bakiti ya bibosono, ba-mbeto ya molako pe oyo ya babeli. Moyangeli ya engumba yango abengaki ngai na telefóne, na mokolo oyo elandaki, mpo nátala mituka etondi na biloko yango, ntango ezalaki koleka na balabala.

<sup>66</sup> Na bongó, basi oyo bazalaki wana, bolumbu, kasi bazalaki koyeba te ete bazalaki bolumbu. Kasi kaka ntango Molimo

Mosantu asimbaki bango, bakangaki maboko na bango mpo na kokende mosika na mibali oyo bazalaki wana.

<sup>67</sup> Pe nazali komituna ndenge nini biso na Amerika, oyo tomibengi ekólo ya Baklisto, pe tozalaka Liboso na Nzambe; kasi mobu na mobu biso, basi oyo ya biso, bazali kolongola bilamba koleka. Kasi bosengelaki kolata koleka. Koleka ozali kolata Klisto, koleka pe okoyeba lolenge na yo mpenza. Mbala mingi natalaka ndenge bato basalaka na balabala, namitunaka soki ezali libóma te. Emonanaka lokola ete basosolaka te ete ntango basalaka bongo, makambo oyo basalaka, bamikómisaka mpambu mpo na zabolo, mpo na kotinda milimo na lifelo. Ya solo. Kasi mokili ebebi lokola na ntango ya Yilimiya.

<sup>68</sup> Sikawa tózongela likambo ya libulu, nzoka nde, libulu, bakoki kotiela yango motema te, mpo ete ekoki komitondisa te. Esengeli kotalela ba-mbula ya mboka wana mpo étonda, ba-mbula ya mboka wana to kolamuka ya mboka wana, kosala mwa mayangani ya kolamuka *awa* pe mwa mayangani ya kolamuka *kuna*, to makambo ya ndenge wana, mpo étonda. Boye bakoki kotiela yango motema te. Ekoki komitondisa te. Ekoki te, na yango moko. Ekoki te. Pe esengeli kotalela ba-mbula, mpo étondisa yango.

<sup>69</sup> Boye, tótala esika e—ezuaka mbula na yango, esika libulu ezuaka mai na yango. Eutaka na likolo ya ba-ndako ya bibwele, ya bibómbelo, epai mopepe ya putulú ememaka bosoto nyonso, ememamaka na mbula, kino na libulu, ebombelo ya mai oyo bato basali. Ekómaka mpenza lokola libulu ya zongo. Pe esukoli motóndo ya ndako, epai ya banyama nyonso, nsolo ya lopango ya bibwele, pe nyonso wana, ekiti. Mopepe ememi pu-putulú ná biloko mosusu likolo ya lopango yango, na nsima mbula ya mboka wana eyei kosukola, mbula eyei komema nyonso wana.

<sup>70</sup> Na nsima, mai yango ememami na nzela ya mai oyo bato basali, eleki na tiyó oyo bato basali, kino na ebombelo ya mai, oyo bato basali. Bongo, soki ekómi kuna, ekómaka mbindo, mbindo mpenza, na lolenge ete osengeli kotia ekongoleli likolo na yango, soki te, okoki komela yango te. Sikawa, bomoni, ememi bosoto longwa na motóndo, eleki na nzela ya mai oyo bato basali, na tiyó oyo bato basali, kino na ebombelo oyo bato basali. Na bongo, batiaka ekongoleli oyo bato basali likolo na yango, mpo banyama mikemike ná biloko mosusu ékota kuna te.

<sup>71</sup> Sikawa, bongo tomoni, na mwa mikolo oyo elandi, ntango mai esili kokota kuna, kati na ebongiseli, to ebombelo oyo bato basali. Bolimbisa ngai. Bolimbisa ngai. Malamu. Nsima na yango—nsima na yango komemama, likindo ná biloko mosusu ya ndenge na ndenge oyo ememamaki kati na yango; sikawa, na suka, soki efandi kuna mwa mikolo, tomonaka ete ekómaka na bosoto.

<sup>72</sup> Pe moto nyonso ayebi, na lisolo ya lingomba, ete soki Nzambe atindi eloko moko, nsango moko, ekómaka sika uta na Nzambe. Na bongo, nsima na—na bomoi ya mobandisi na yango, to soko nani; bokoki kobenga ye mobongisi, to nyonso oyo bolingi koloba na ntina na yango. Nsima na liwa na ye, bato bakómaka na mobulu mingi pe basali ebongiseli. Pe kaka ntango bakómisi yango ebongiseli, ekufi na mbala moko. Ekolamuka lisusu te. Esalemaki bongo mbala nyonso, kala, longwa na ebandeli.

<sup>73</sup> Mpo na kopesa limemia na sánzó ya Katoliko oyo afandi awa; ntango Nzambe abongisaki lingomba . . . kútu, Akómisaki yango ebongiseli te, Nzambe akómisa naino lingomba moko ebongiseli te. Azalaka kati na makambo ya ndenge wana te. Azalaka nde kati na mbotama, na ebongiseli te, ezalaki bongo ntango Nzambe abandaki lingomba na Mokolo ya Pantekote. Na nsima, sukasuka, kuna na Nicée, na Roma, bakómisaki yango ebongiseli, pe kuna nde epai ebungisaki Nguya na yango.

<sup>74</sup> Na nsima, tokómaki na ntango ya kobongisa ya Luther, pe ezalaki likambo ya monene. Liloba na Nzambe epesamaki: “Moyengebeni akobika na kondima.” Na ntango yango, na esika bango nyonso básosola, bango nyonso elongo pe bákoba kokende liboso, bango basalaki lingomba ya ba-Lutherien, bakabwanaki na etonga yango, pe na nsima ekufaki.

<sup>75</sup> Na nsima, Nzambe atelemisaki John Wesley, ná kobulisama, nsango ya mosala ya mibale na Ngolu, pe ezalaki likambo ya kitoko mingi. Kasi nsima na Wesley ná Asbury, bakómisaki yango ebongiseli, ekufaki.

<sup>76</sup> Na nsima, ba-Pantekotiste bayaki ná bozongi ya makabo. Bazalaki malamú, likambo nini esalemaki? Bakómisaki yango ebongiseli pe ekufaki. Ndenge wana mpenza.

<sup>77</sup> Sikawa kati na nyonso oyo, Nzambe azali naino kobenga mwa bato moke longwa na bikeke wana moko na moko. Ya solo, Azali kobenga. Pe ekómi ngala na biso ya kobima, ya kosangana. Yango wana ngai namoni ete, Bato na Mombongo ya Nsango Malamú Mobimba basali mosala monene ndenge babuki bitutú oyo, pe balobi ete: “Bokeseni ezali te kati na biso. Tósangana pe tókumbamela Nzambe na ntina moko, kasi na ebongiseli te.” Soki ezalaki ebongiseli, nalingaki kolongwa mbala moko na etumbelo oyo. Nazali na ntina na yango te.

<sup>78</sup> Likambo ezali ete, esengeli nde kozala na bondeko, pe bondeko na bindimeli moko boye te. Kasi bondeko kati na Klisto, na nguya ya lisekwa na Ye, yango nde eloko oyo epesaka Bomoi. Epesaka mbotama.

<sup>79</sup> Pe liboso ete mbotama ésalema, toyebi ete liwa esengeli kozala liboso na mbotama. Pe mbotama ezali eloko ya mbindo, ata soki ezali mbotama nini. Ézala na lopango ya ba-ngulu, to—to wapi, ezali eloko ya mbindo. Mbotama ya sika pe ezali bongo, ekosalisa makambo oyo, na momesano, okoki kokanisa kosala

yango te. Kasi soki obelemi mpo na kokufa na yo moko, nde obotami mbala ya sika, okómi ekelamu ya sika kati na Yesu Klisto, na ntango wana makambo efongwami pe bomoi ekómi sika mpo na yo, mpo ete ondimi Moto oyo Yesu Klisto, kasi likanisi to endimeli moko boye te.

<sup>80</sup> To, ata na oyo etali Liloba oyo ekomami, esengeli ete Molimo Mosantu ápesa Yango bomoi. Ata soki ozali na likindo boni, ezali ya kokufa. Nakoki kozala na ndambo ya masangu na loboko; soki elandi nzela oyo esengeli te mpo na kozua bomoi, masangu yango ekozala na bomoi ata moke te. Pe okoki kozala na diplome ya docteur, na filozofi, na droit, to na nini; kasi soki Molimo Mosantu ayei likolo na yango te mpo na kopesa yango bomoi mpo na yo, na lolenge ya lobiko oyo ya yo moko elongo na Nzambe, na ntango wana masangu yango ezali na ntina te. Mayele na yo ezali ya mpamba.

<sup>81</sup> Ndenge moto ya Angletere oyo alobaki awa mokolo wana na mpokwa, ekamwisaki ngai mingi. Mayele nyonso oyo azalaki na yango, lokola Polo, asengelaki kobosana nyonso oyo ayebáká, mpo na komona Klisto, kosala makambo oyo akanisáká ete akokaki kosala te.

<sup>82</sup> Kasi Nzambe asalaka nde bongo, Ayokisaka biso nsoni na makambo na biso ya kelasi. Nalobi te ete boínga ezali malamumu, kasi nazali komeka kotalisa bino bokeseni. Kelasi ekoki kopesa Bomoi ata moke te. Mpo na kopesa Bomoi, esengeli ete Molimo na Nzambe ézala, pe Bomoi yango esengeli te kouta na mayangani ya kolamuka oyo ya mayele ya bongó. Esengeli nde kouta na Biblia, kolamuka ya Liloba, pe Liloba yango ezali ndenge moko lobi, lelo, pe libela. Soki Ekiti lelo, pe Epesi bomoi, okozua mbano moko, lokola na Misala 2. Ndenge moko mpenza. Ezalaki ntango nyonso bongo, ekozala pe ntango nyonso bongo, mpo ete Molimo na Nzambe nde epesaka zebi ya malamumu.

<sup>83</sup> Mpo na kosala makambo, esengeli ete zebi ya malamumu ézala. Yango wana balakisaka bino ntango nyonso ete: “Bóyáka na bana na bino awa.” Ee, ezali mpenza ya solo. Nasepelaki ntango namonaki mwana na ngai ya mwasi, Rebekah, kokota pe kofanda, kala mingi te. Bamosusu kati na bino bamonaki ngai ntango nabwetelaki mwasi moko liso, ezalaki nde mwana na ngai ya mwasi, boye akotaki pe afandi. Mposa na ngai ezali ete ázua libatisi ya Molimo, pe yango nde ntina azuami awa na liyangani. Yango nde ntina na yango. Esengeli ete zebi ya malamumu ézala.

<sup>84</sup> Ndenge mobange Docteur Bosworth azaláká koloba: “Okoki kozua líki ya soso pe kotia yango na nse ya mwana ya mbwa, ekobimisa mwana ya soso.” Mpo na nini? Mpo ete ezali líki pe ezali na zebi ya malamumu.

<sup>85</sup> Mpo na ngai, ezali na ntina te soki ozali Metodiste, Batiste, Presbiterien; kati na zebi ya malamumu, ekobimisa mwana na

Nzambe oyo abotami sika, oyo akosenga Liloba. Zebi ya malamau nde esalaka bongo, ata soki ozali na nkómá ya ebongiseli nini.

<sup>86</sup> Nazaláká kosangisa bibwele. Nazalaki kotala mobateli na bibwele ntango tozalaki komema bango kino na zamba, longwa na—longwa na bisika ya kolia, kuna na mapango ya bibwele, pe tozalaki komema bango na zamba. Azalaki kotelema wana pe kotala ndenge bazalaki koleka na ekuke, na lopango ya bibwele. Azalaki kokeba mpenza na bilembo te, mpo ete bilembo ndenge na ndenge ezalaki koleka wana. Kasi eloko moko ezalaki, oyo azalaki kotala malamau: nkómá ya makila. Esengelaki kozala ngombe ya lolenge ya Hereford oyo ya solosolo, soki te, ekokaki kokota na zamba wana te, mpo ete Lisanga mpo na ba-Hereford nde bazalaki koleisa bangombe na bango na zamba yango. Esengeli kozala na nkómá ya makila, mpo lolenge ya bibwele ézala ntango nyonso oyo ya malamau.

<sup>87</sup> Nakanisi ete ekozala pe bongo na Mokolo ya Kosambisama. Akotuna ngai te soki nazalaki Metodiste, Batiste, Pantekotiste, to Presbiterien, kasi Akotala nde nkómá ya Makila. “Soki Namoni Makila, Nakoleka likolo na bino.” Yango nde likambo.

<sup>88</sup> Bongo, tomoni ete mabulu yango, soki eumeli mwa moke, ezalaka . . . ekómaka na bosoto pe ezalaka lisusu na ntina te. Ekómaka pe, na ntango wana, ekómaka ndako ya magbololo, miseleketete, banyoka, banyama mikemike, mikolóbe, ná nini lisusu, mpo ete biloko oyo elingaka bosoto nde ekendaka kuna. Okoki kokanisa, ememí mbindo oyo euti na motóndo ya ndako ya bibwele, to ya ba-ndako oyo ezali pene na ndako ya bibwele, to na bisika oyo mbindo ekoki kozala, lolenge nini ya banyama mikemike ná mikolóbe, ná biloko mosusu, oyo esukolaka na kati ya libulu wana?

<sup>89</sup> Nzoka nde, ezali ndakisa mpenza ya lolenge nyonso ya mimesano oyo bato basali. Kútu, azangi elonga. Yango nde ntina asengeli na Mobikisi. Akokaki komibikisa te, azali na makoki ya komisunga te. Kútu, asílá kobunga. Abótámá na mokili, mosumuki, ayei na mokili ná lokuta na monoko. Kútu, azali mokosi, yango wana, akoki komisunga ndenge nini? Ndenge nini mosantu akoki komisunga?

<sup>90</sup> Mosantu azalaka te. Lingomba mosantu ezalaka te. Ezali nde Molimo Mosantu! Lingomba mosantu te, libota mosantu te; ezali nde Molimo Mosantu kati na libota, ezali nde bongo. Amen. Ezalaki ngómbá mosantu te, esika Petelo ná bamosusu bamataki; ngómbá ezalaki mosantu te. Kasi ezali nde Nzambe mosantu, likolo na ngómbá yango, nde akómisaki yango mosantu. Ezali moto mosantu te; ezali nde Molimo Mosantu, asaleli moto yango, nde akómisi ye mosantu. Moto yango te; kasi Moto oyo Molimo Mosantu! Ezali moto yango te; mpamba te, azali kaka moto, “abótámá na masumu, zemi na ye ezuumaki na lisumu na nko, ayaki na mokili ná lokuta na monoko.”

<sup>91</sup> Mimesano nyonso oyo moto asali ekokanga ye moko; miso na bango ya mayele, mayele ya bongó, ekomona likambo yango te, na lolenge ete bakomilobela: “Nasambelaka, nkombo na ngai ekomami na buku ya lingomba. Nasálá likambo *boye*. Tata na ngai azalaki moto *boye*, pe bongo na bongo.” Ezali mabe te; yango, ezali bongo, toboyi te. Kasi ata bongo, moninga na ngai, Yesu alobaki: “Soki moto abotami mbala na sika te, akoki ata komona te,” *bomoni*, wana, elingi koloba te ete akomona na miso na ye, kasi, “*kososola* Bokonzi ya Likolo.” Kino ete óbotama kuna!

<sup>92</sup> Mopalanganisi Nsango Malamu wana, oyo ya Batiste, azalaki kotiola pe koseka Yango, alingaki komona yango ndenge nini? Bomoni, azali ata na eloko moko te kati na ye, oyo ekokaki ata koyamba Yango; kasi Nzambe atindamaki kosala yango, bomoni. Nzambe apesaki ye Molimo Mosantu. Atalisaki ete oyo ezali na bilongi mibale te, oyo ezali nde Liloba. Ayebi yango kaka uta na likanisi ya kelasi, balukaka kozua ma—mapamboli nyonso ya Nzambe pe kotia yango na ntango oyo esílá koleka.

<sup>93</sup> Elenge motei moko ya Batiste, awa eleki ntango molai te, azali awa sikawa na ntongo oyo; ayaki epai na ngai, pe alobaki: “Ndeko Branham, ozali kosala likambo bobele moko, oyo ezali malamau te.”

Nalobaki: “Sunga ngai.”

<sup>94</sup> Pe alobaki: “Ozali, nakanisi ete ozali sembo pe moto malamau, kasi. . .”

Nalobaki: “Natondi yo, misie.”

Alobaki: “Kasi likambo ezali moko mpamba, oyo ozali kosala malamau te.”

Nalobaki: “Nabanzi ete Nkolo pe amoni likambo kaka moko, oyo ezali malamau te.”

<sup>95</sup> Pe alobaki: “Ee, ezali. . . Likambo oyo ozali kosala, oyo ezali malamau te, yango oyo.” Alobaki: “Ozali koluka kokotisa mosala ya bantómá kati na mokili, nzoka nde,” alobaki, “mosala ya bantómá esilaki ntango bantómá basilaki.”

<sup>96</sup> Nalobaki: “Lokola yo Batiste, ngai pe Batiste, nasepeli kotuna yo motuna moko.”

Alobaki: “Nini?”

<sup>97</sup> Nalobaki: “Ondimi ete Liloba na Nzambe epemelami, na mobimba?”

Alobaki: “Ee, na ntembe te.”

<sup>98</sup> Nalobaki: “Boye, Alobaki: ‘Kobakisa liloba moko te, kolongola pe Liloba moko te.’ Mpamba te,” nalobaki lisusu, “ngai nakolakisa yo epai Lipamboli ya bantómá eyaki epai na bato, na nzela na elaka ya Nzambe, sikawa yo okolakisa ngai elaka ya Nzambe pe ntango nini yango etikaki bantómá. Omoni,



soki otalisi yango kati na Liloba te, na bongo—na bongo bosana yango, omoni,” nalobaki, “mpo ete ezali kokoba kino lelo.”

<sup>99</sup> Afandaki kimia, mwa moke. Bongo nalobaki: “Ee, boye, ndeko na ngai, nasepeli kotuna yo boye. Petelo moto abandaki nsango ya bantómá, na Mokolo ya Pantekote. Pe biso nyonso toyebi ete ezali ya solo, mpamba te ye moto azalaki na ba—fungola ya Bokonzi, oyo Yesu apesáká ye. Sikawa tala malamú oyo alobaki. Alobaki: ‘Bobongola mitema, moko na moko na bino, pe bobatisama na Nkombo na Yesu Klisto mpo na kolimbisama ya masumu na bino, pe bokozua likabo ya Molimo Mosantu. Mpo elaka ezali mpo na bino, pe mpo na bana na bino, pe mpo na baoyo nyonso bazali mosika, ebele nyonso oyo Nkolo Nzambe na biso akobenga.’ Na bongo, soki esika moko ezali, epai Alongolaki yango, boye likambo nini ekómelaki maloba ya Petelo na Mokolo ya Pantekote?” Bomoni? Te, naino esili te!

Molingami Mwana na Mpate oyo akufaki,  
Makila na Yo ya motuya  
Ekobungisa Nguya na yango ata moke te,  
Kino ete Lingomba mobimba ya Nzambe,  
Oyo esikolami, ébikisama, ete ésumuka lisusu  
te.

Boye na loyembo ya motuya pe kitoko,  
Nakoyembela Nguya na Yo oyo ebikisaka,  
Ntango mwa lolémo oyo ekotatabanaka, na  
likukuma  
Ekofanda kimia na kati ya nkunda.

<sup>100</sup> Nzambe ázunga ngai ete nándima Yango pe ná kangama na Yango, biso nyonso, pe tótika Yango te, mpo ete Ezali Solo ya Nsango Malamú! Iyo, misie.

<sup>101</sup> Moto na bwanya asengeli kotala makambo oyo ata moke te. Akoyeba ete ekosimba te. Esímbá naino ata mokolo moko te. Losambo oyo ebongisami pe lobiko oyo ebongisami ekosimba ata moke te na Miso na Nzambe. Esengeli kouta epai na Nzambe, kozanga kosangisama. Nzambe asálélá naino yango ata mokolo moko te, Nzambe asálélá naino mimesano ya boye ata na eleko moko ya kala te. Sikawa bino, oh, bokómi kozua bandimi ya lingomba pe bato ya ndenge wana. Kasi nalingi koloba momboto ya solosolo, oyo ya Nzambe, Lipamboli lokola oyo ekitaki na Mokolo ya Pantekote, eyaka na nzela na ebongiseli te; eyaka nde na nzela na mbotama, kobotama mbala ya sika.

<sup>102</sup> Basengi na biso ete tózua Yisalaele lokola—lokola ndakisa, solo bazalaki ndakisa. Botala: “Batikaki Ye, liziba oyo epesamelaki bango, pe bamitimolelaki mabulu.” Bokoki kokanisa li—li—li—likambo ya boye, na ntango oyo moto azali komela na liziba, bongo áyóka mposa ya komitimolela libulu, bomoni, mpo ámela mai na yango? Nzoka, yango nde oyo mosakoli alobaki, yango nde oyo Liloba na Nzambe elobaki.

Yango nde oyo Nzambe alobaki na mosakoli. “Botiki Ngai pe—pe bosundoli Ngai, liziba ya mai na bomoi; pe bomitimoleli mabulu, oyo etobóká, pe ezali kotangisa mai.”

<sup>103</sup> Botala likambo moko. Bazalaki na mposa ya eloko oyo bakokaki kokonza, to mpo na kolakisa oyo basaláká. Oyo wana—oyo wana nde bolema ya mangomba oyo ebongisami. Emekaka ntango nyonso, basengeli kokotisa pe eloko oyo ya bango moko. Basengeli kozala na mimesano nyonso oyo ná bitóngá ya bato, ná makambo mosusu, “Nakómi mondimi ya lingomba *boye*.” Na esika ya kozala kaka bana na Nzambe oyo bazali na komikitisa, bango bazali na mposa ya eloko moko mpo bámilakisa. Na esika bátika Nzambe ásala na ndenge na Ye, bango bakómaki na mposa ya kosala na ndenge oyo ya bango. Ndenge wana nde mimesano ekómisi mangomba lelo oyo. Ezali te ete... Ebongiseli moko na moko, moko elingi ete ézala *boye*, mosusu elingi ete ézala *bongo*. Soki ozali Metodiste, osengeli kozala *boye*. Batiste, *boye*. Presbiterien, Katoliko, to nani mosusu, bazali na mimesano na bango. Naboi yango te, kasi nazali kolobela oyo wana te.

<sup>104</sup> Moto alingaka kosala na ndenge na ye, Nzambe pe azali na lolenge oyo ya Ye. Pe Alobaki: “Botingami na lolenge oyo ya bino, libulu etobwani; pe boboyi kondima lolenge oyo ya Ngai, lolenge ya Bomoi.”

<sup>105</sup> Ekómi pe bongo lelo. Ebongwani ata moke te. Bókanisa naino elémá ya moto, oyo akotika liziba ya mai kitoko pe ya peto, oyo ezali kotoka, bongo alingi kokende na libulu oyo etobóká, oyo ye moko atimoli, pe amitimoleli libulu, oyo etondi na bosoto oyo euti na motóndo ya ndako ya bibwele, na nsima ameli mai na yango. Na ntembe te, bongó ya moto wana ezali mpenza malamau te.

<sup>106</sup> Pe soki moto atingami na—na lolenge ya komona ya mangomba, mpo na Makomi, na esika ya koyamba Molimo Mosantu oyo atatulaka Makomi pe akokisaka Yango mpo na bino, molimo ya moto wana ezali mpenza malamau te. Ya solo mpenza. Na ntembe te, Molimo Mosantu! Lingomba moko na moko ezali na ndimbola na bango ya Biblia, oyo bamoni ete ezali malamau. Nzambe azali na mposa ya lisungi na bino te. Nzambe azali na mposa ya ndimbola na bino te.

<sup>107</sup> Nzambe azali molimboli na Ye Moko. Nzambe alimbolaka na lolenge oyo Ye—na lolenge oyo Ye alobi ete Akosala yango. Na ebandeli, Yawe alobaki, “tika ete pole ézala,” pe pole ezalaki. Oyo wana ezali na ntina ya ndimbola te. Yango nde oyo Nzambe asalaki. Alobaki “moseka akokumba zemi,” pe akumbaki zemi. Oyo wana ezali na ntina ya ndimbola te. Alobaki ete “Akosopa Molimo na Ye likolo na bato nyonso,” pe Asopi. Ezali na ntina ya ndimbola te. Nzambe alimbolaka Liloba na Ye Moko ntango akokisi Yango, ntango alakisi Yango, pe ntango atalisi Yango polele.

<sup>108</sup> Ndenge wana nde bazalaki koyeba basakoli ya Nzambe. Alobaki: “Soki moto moko azali kati na bino, moto na molimo to mosakoli, Ngai Yawe Nakomiyebisa na ye na bimononeli, Nakosolola na ye na ba-ndoto. Pe soki oyo ye alobi ekokisami, bóbanga ye; kasi soki ekokisami te, bóbanga ye te.”

<sup>109</sup> Ezali ndenge moko ntango Nzambe alobi Liloba na Ye, soki moto alobi: “Liloba ezali nde *Oyo*,” pe esalemi ndenge wana, na ntango wana, Nzambe moto asali yango.

<sup>110</sup> Kasi soki alobi: “Ezali *boye*, pe ntango wana esilá koleka,” mpo na nini ezui. . . Asemboli loboko mpo na kozua lipa ya bana oyo bazali na nzala, na loboko na ye, pe abotoli bango yango; pe bango bakufi nzala. Mpo na nini okolinga komela mai ya libulu na ntango oyo libulu ya solosolo ezali wana?

<sup>111</sup> Sikawa, liziba ya Bomoi ezali nini? Liziba ya Bomoi ezali nini, liziba ya Mai na Bomoi? Tokoki kokokanisa Yango na libulu ya solosolo.

<sup>112</sup> Sikawa nalingi ete bóyeba bokeseni kati na libulu ná liziba ya mai na bomoi; kati na libulu oyo ya solosolo, ná libulu wana ya kala, oyo etobóká, etóndá na banyama mikemike, miselekete, magbololo, mikolóbe, ná biloko mosusu, bomoni.

<sup>113</sup> Libulu ya solosolo ezalaka boye. Botala yango sikawa. Emisungaka yango moko. Ozali na ntina ya kozua mimesano minene pe komema mbongo mingi kati na yango te. Ozali na ntina ya kosangana na bandimi oyo bazali ebele te. Esungaka bandimi na yango, bazali na Molimo na Bomoi kati na bango, pe ezali kosala.

<sup>114</sup> Bótala mai na yango, sika, peto, kitoko. Kasi libulu te, eloko oyo ebéba, oyo bato ntuku minei, ntuku mitano bakotisi makanisi na bango na kati, balobi: “*Oyo* ezali malamú, *oyo kuna* pe ezali malamú, ná likanisi *oyo*,” bavoté pe bandimi yango, ndenge basalaka, na suka babimisi ebongiseli. Ezali nde Liloba na Nzambe ya peto pe kitoko, oyo esangisami te, euti na loboko na Nzambe. Ezali mpenza libulu oyo ya solosolo.

<sup>115</sup> Bótala, sekelé ya nguya na yango ezali na kati na yango moko. Moto akoki komona yango te. Mwa bokasi moko, na nse na yango, nde ematisaka yango likolo.

<sup>116</sup> Namikaniseli ntango nazalaki kobatela banyama ya zamba na etuka ya Indiana. Nazalaki koleka na libulu moko, na liziba moko, na Mabelé ya Harrison. Ezalaki kotoka ntango nyonso. Pe, oh, ezalaki lokola eloko oyo ezali na esengo koleka. Ézala matandala ezali na mabelé, glas, ekangami na malili, ata soki malili ekómi makasi, yango ezalaki kaka kotoka; na ntango oyo bitímá ná bibombelo ya kala, oyo bato basalaki, magbololo ná biloko mosusu na kati, oyo ezalaki kuna, ezalaki kokangama na malili, kokóma lokola libanga.

<sup>117</sup> Elakisi ete ebongiseli nyonso, soki ezangi Molimo mwa moke to soki zebi ebongwani mwa moke, ekokangama na malili. Kasi libulu ya solosolo ya Nzambe, Ye azali—Ye azali ndenge moko lobi, lelo, pe libela. Ntango ezali kotoka, ezali pe kotindika pe kobwaka biloko nyonso libanda. Kútu, eloko ata moko te etikalaka na kati. Kaka na ntango oyo yango ekoti, ebwaki yango libanda.

<sup>118</sup> Liziba yango ezalaki kotoka ndenge wana, pe nalobaki, mokolo moko nafandaki wana, namilobelaki: “Nabanzi nakosolola mwa moke na liziba yango.” Nalngolaki ekoti na ngai, pe nalobaki: “Eloko nini epesaka yo esengo boye? Eloko nini etokisaka yo boye? Ntango mosusu ezali mpo ba-mbólókó bamelaka mai na yo, na ba-ntango moko boye.”

Soki azalaki na makoki ya koloba, alingaki koloba: “Te.

Nalobaki: “Ntango mosusu ezali mpo ngai namelaka mai na yo.”

“Te, ezali bongo te.”

<sup>119</sup> Nalobaki: “Ee, eloko nini ekómisaka yo peto pe kitoko boye? Boye eloko—eloko nini yango etokaka, etokisaka yo, etondisaka yo na esengo ntango nyonso, na lolenge ete eloko moko te ekoki kokanga yo na malili? Ozali kopumbwisa mai na likolo, kasi eloko moko ezali wana te; mai kitoko.”

<sup>120</sup> Soki ekokaki kosolola na ngai, boyebi soki libulu yango elingaki koloba nini? Alingaki koloba: “Ndeko Branham, ngai nde natokaka te. Ezali eloko moko nsima na ngai, nde etokisaka ngai.” Pe ezalaka nde bongo. Nalobi yango malamú te, kasi boyebi oyo nalingi koloba.

<sup>121</sup> Ezali pe bongo mpo na lobiko ya moto oyo aleki na mbotama ya sika. Okoki kopekisa yango te. Ezali li—libulu ya mai kati na yo, nde etokaka kino na Bomoi ya seko. Bomoni, ntina moko ezali, oyo etali ata yo te. Bibombelo oyo bato basali, mai na yango ekoki kokangama na malili, pe ekosenga kolamuka ná makambo mosusu; kasi moto oyo azali na nse ya Liziba wana, oyo azali kobika na kati ya Liziba wana, azali na yango butu pe moi! Te, ozali na ntina ya kotalela ba-mbula ná ba-kolamuka ya mboka wana te. Otondi na Yango. “Nakopesa ye liziba ya Bomoi, kati na ye, oyo ekotoka ntango nyonso.” Eloko moko ezali kati na Yango, oyo ezalaka sika mokolo na mokolo, peto pe kitoko. Ezali Liloba na Nzambe, oyo esangisami te, kati na motema pe na monoko na yo, nde Emitatolaka, Emilobelaka. Ata soki mbula ezali konóka, ata soki matandala ezali kokita, ata soki ntango ezali ndenge nini, ozali kaka na esengo mpo ete Molimo Mosantu azali kotoka kuna na kati. Ezali Nguya oyo ebombami. Bótala. Oh, sekelé na yango ezali na kati na yango.

<sup>122</sup> Epesaka mai na yango, ofelé, epai na moto nyonso oyo ayoki mposa ya komela pe ya kosalela makoki na yango. Na ntango wana, okopona-pona te, mpo na koloba: “Ee,

sikawa nasengeli kaka kokende koluka kolamuka na lingomba Metodiste mpo ngai nazali Metodiste. Nakosengela koya *awa*, kasi (soki) nasengeli kokende epai ya ba-Pantekotiste mpo ngai nazali mopalanganisi ya kolamuka ya Pantekote epai na ba-Pantekotiste.” Yoka, soki osili kozua libulu oyo ebimisaka Mai, Liziba wana, ntango ozali komela mai na yango, bokeseni ekozala te, okopesa na moto nyonso oyo akoleka wana. Okosepela kopesa elikia ya Bomoi epai na mo-Katoliko, na moto ya Misioni, na mo-Yuda, na moto oyo andimi te ete Nzambe azali, to nani. Ozali mpenza, mpenza na Eloko moko kati na yo, oyo ezali kosala yango.

<sup>123</sup> Bótala likambo mosusu na ntina na yango, ozali na ntina ya kopompé yango te. Ozali na ntina ya kobenda yango te, pe ya kopompé yango te. Namóná yango mingi na lolenge ete ekóma kopesa ngai mposa ya kosanza, kopompé eloko moko boye; kobeta miziki makasi, pe kopumbwa-pumbwa, to—to babúku ebele-ebele kuna na ville, ná nkómá ya minene mpenza: “Moto ya eleko oyo.”

<sup>124</sup> Moto ya eleko oyo azali bobele moko, ezali nde Yesu Klisto, Oyo azali ndenge moko lobi, lelo, pe libela. Motindami kouta na Nzambe azali bobele moko, ezali—ezali nde Yesu Klisto. Iyo, misie.

<sup>125</sup> Ozali na ntina ya kopompé Oyo te, to ya kobenda Yango na nse te. To, te, ozali na ntina ya kokota Kuna te. Zua Yango kaka, ofelé. Amen. “Nazali Liziba ya Mai na Bomoi; botiki Ngai, pe bokei komisalela bibombelo.” Nzoka nde, otindami te kopompé Yango, kopompé Yango, kobenda Yango, pe kokota Kuna, kotimola Yango, eloko mosusu te. Otindami kaka kotóka mai na Yango, ofelé.

<sup>126</sup> Ozali na ntina ya likindo oyo bato basali te, lokola ekongoleli, mpo éyebisa yo eloko nini eleki na nzela na Yango, pe oyo Yango esali. Eloko moko te. Likindo oyo bato basali, oyo ya mimesano ya kelasi, ya losambo ya komilongisa na likambo *boye*, na likambo *boye*, to libulu ya mimesano ya mangomba; ozali na ntina na yango te. Ezali na ntina ya kozala wana te. Soki otii ekongoleli likolo na Yango, Ekopumbwisa yango na mbala moko. Ezali na ntina na yango te. Emisungaka yango moko! Nguya na Nzambe nde ezali komata kino na Bomoi. Mpo na nini moto akolinga kotika Eloko ya ndenge wana, mpo na kokota na mimesano, eleki nyonso oyo nakoki koloba. Ezali na ntina ya bikongoleli te. Ezali na ntina na yango te. Ezali na ntina te, ezali na ntina ya kotalela ba-mbula ya mboka wana te mpo na kotonda. Ezalaka ntango nyonso ya kotonda. Amen.

<sup>127</sup> Moto moko, nayokaka bato koloba: “Nazali mpenza na mawa mingi lelo.” Hólalá!

<sup>128</sup> Oh, nazali na esengo ya kobika Liboso na Nzambe, ézala na ntango makambo ezali kotambola malamú to malamú te. Azali

Bomoi na ngai. Amen. Azali Bomoi na biso. Azali Bomoi, Bomoi na boíké. Iyo, misie. Pe—pe bótala makambo oyo Yango ezali kosalela biso. Nguya pe bopeto na Yango ezali na kati na Yango moko. Ezali na ntina te ete bápompé yango longwa na libulu to na mimesano mosusu.

<sup>129</sup> Moto moko alobaki: “Ee, ozali na kálati ya lingomba nini? Lakisa soki ozali Batiste malamumu. Nalingi námona soki ozali na kálati. To—to, Pantekotiste malamumu, soki ozali Unitaire, Binitaire, Trinitaire, to—to nani mosusu.” Bomoni, Ezali na ntina te ete bápompé yango. Ekendaka ntango nyonso liboso. Iyo.

<sup>130</sup> Boyebi, nazaláká na libulu moko ya kala, nasengelaki kosopa mai na kati pe kopompé, kopompé, kopompé, na pómpi ya kala, oyo ebendaka mai, mpo na kobenda mai longwa na libulu; boyebi, nazalaki kosopa mai mwa mingi na kati, nazalaki kosopa nde libóké ya banyama mikemike ná biloko mosusu na kati, mpo na kobimisa banyama mikemike ná biloko mosusu na pómpi yango. Ekokani mwa moke na ba-kolamuka ya mimesano oyo.

<sup>131</sup> Kasi, matondi na Nzambe, “Liziba moko ezali, oyo etondi na Makila, epai basumuki bamibwakaka!” Okosala bandimi ya lingomba te; okosala ete bákóma nde Baklisto, soki bakómi na Liziba yango.

<sup>132</sup> Mpo na nini okolinga kotika Liziba ya mai na bomoi, mpo na komela na libulu ya zongo ya ndenge wana?

<sup>133</sup> Bapompaka te; nguya na Yango ezali na kati na yango moko. Ezali na ntina te ete bápompé Yango, iyo, misie, mpamba te (Yango mpenza) Bomoi na Yango Mpenza ezali na kati na Yango moko. Momboto ya Nzambe ezalaka pe bongo na kati ya motema ya moto. Bomoi ya Nzambe ezalaka na kati ya moto na moto, na kati ya lingomba te. Na kati na yo nde, ezali na kati na yo, yo nde ozali na momboto ya Bomoi na kati na yo.

<sup>134</sup> Soki moto ameki elengi na Yango mbala moko mpamba, endimisaka lolenge nyonso ya bayangeli na mangomba. Bótuna sánzó ya Katoliko oyo, bótuna Batiste oyo, ata nani. Soki moto ameki elengi ya mai kitoko ya liziba oyo, mbala moko mpamba, nayebisi bino, endimisaka bato ete Ezali Solo. Molimo na yo, oyo ezali na nzala, kutu, endimisaka kutu baoyo bazali na mposa ya mai. Boye, soki ozali na mposa te. . . Elenge Batiste oyo, azalaki kútu na mposa ya mai te; kasi ntango ayokaki mposa, mai yango ezalaki mpenza elengi. Ya solo, kasi osengeli nde koyoka mposa, “mposa oyo epambolami,” ndenge Yesu abengaki yango. “Mapamboli epai na bino bozali na nzala pe mposa ya boyengebene, mpo bokotonda.” Pe Yesu moto alobaki bongo, moninga. Iyo, misie, Ezali Liziba oyo epambolami mpo na baoyo bazali na mposa ya mai.

<sup>135</sup> Mpo na nini moto akolinga kokaba Yango mpo ázua mai ya mabe? Ndenge nini okoki kolinga kokaba mai ya libulu ya solosolo mpo ózua mai ya mabe, oyo etondi na banyama

mikemike pe na mbindo ya makanisi ndenge na ndenge ya bato, oyo Nzambe alobelaki ete: “Kobakisa liloba moko mpamba na Liloba na Ye, to kolongola Liloba moko mpamba na Maloba na Ye, Nzambe akolongola likabo na ye na Búku na Bomoi.”?

<sup>136</sup> Nzoka nde Nzambe alakaki ete Akotatola Liloba oyo na bikeke nyonso: “Mpo elaka ezali mpo na bino, pe mpo na bana na bino, pe mpo na baoyo nyonso bazali mosika, ebele nyonso oyo Nkolo Nzambe na biso akobenga,” mpo na nini okolinga kopompé na pómpi ya mimesano, oyo eyeisami mbindo kati na mibu ebele, uta na mána moko ya kala? Ntango mosusu mána yango ezalaki malamú, naboi te, na eleko ya Martin Luther, na eleko ya *songolo* pe na eleko ya *pakala*, ná babongisi mosusu, naboi te; kasi oyo wana ezali mána oyo ekwéa kala.

<sup>137</sup> Soki totali malamú na Biblia, basengelaki kolokota yango mokolo na mokolo. Basengelaki kozua oyo ya sika. Soki eumeli mwa moke, ezalaki kopola. Ekoki kopola te, kozanga ete ébeba. Esengeli kozala na mikolóbe na kati na yango, to eloko mosusu mpo—mpo na kopolisa yango. Toyebi ete ezalaka bongo.

<sup>138</sup> Mimesano ya bato ezalaka pe bongo! Soki eumeli wana longwa na kolamuka monene moko kino na oyo mosusu, eyeisamaka mbindo pe etondaka na banyama mikemike, lokola libulu oyo etondi na mataká, ndenge tozaláká kobenga yango, mwa banyama mikemike oyo ezalaki kobina-bina na kati na yango.

<sup>139</sup> Pe yango nde likambo na lobiko ya bato mingi lelo. Ba—batondi mpenza na mataká, bazali kotambola-tambola longwa epai na moko kino epai na mosusu, epai na moko kino epai na mosusu, kobeta masolo oyo ezali na Bosolo ata moke te kati na yango. Ya solo, kotambola-tambola, longwa epai na moko kino epai na mosusu. “Nazaláká Metodiste; nakómi epai ya ba-Batiste. Nazaláká mo-Katoliko; nakómi na lingomba *songolo*. Nakómi na lingomba *pakala*.” Bazali bobele mataká. Oh, bosana yango na mobimba!

<sup>140</sup> Pe yaka na Liziba, amen, Libulu oyo ya solosolo, Bozali ya Klisto, oyo ya ntango nyonso! Nandimi ete Azali Liziba na Bomoi oyo ekaukaka te. Koleka ozali komela epai na Ye, koleka pe ekokóma ya sika, koleka pe ekokóma na mpio, koleka pe ekokóma kitoko, koleka pe ekokóma na elengi. Uta nabandá kosalela Ye, ekokisi sikawa mibu ntuku misato na misato, pe mokolo na mokolo, ekómaka na elengi, koleka mokolo oyo eleki. Naino nazalá . . . Alobaki ete okoyoka lisusu mposa ata moke te, soki tomeli Mai oyo. Tala ndenge Ezali na motuya. Oh!

<sup>141</sup> Yisalaele basalaki lokola bato mingi lelo, batikaki liziba ya mai na bomoi, mpo na kokende komitimolela mabulu.

<sup>142</sup> Sikawa tólobela naino ngolu mwa moke, oyo ngolu na Nzambe ezali. Tokómá na mibeko ná mitíndo: “Soki okómi na molai oyo te. . . Nazali na língénda ya kopíma na yango

mangomba; soki okokani na molai na yango te, osengeli kokokana na yango, okoki kokota te,” pe bongo na bongo. Kasi Nzambe abikisaka biso na ngolu, kasi na língénda ya kopíma na yango te. Bomoni? Kasi Nzambe, tozali kolobela nde ngolu, ndenge esalemaki ete ézala boye, ete tómela epai na Ye. Uta na língénda ya kopíma na yango. . .

<sup>143</sup> Koyima-yima, Koyima-yima ya Yisalaele. Bótala, Alobaki: “Nakoya kotala bino lisusu.” Bótala malamú na Makomi. Bótala, Alingi ámeke bango, átala bango lisusu. Koyima-yima ya Yisalaele, na Mbu Motane, esengamaki na bango ete bálanda Ye, bákatisa mai ya Ezipito, oyo ya bosoto, mpo bákóma na bonsomi. Bazalaki baumbu. Esengamaki na bango ete bákatisa ngámbo mpo bákóma na bonsomi, elongo na Ye. Bókatisa mbu oyo ekúfá, mbu oyo ekúfá; Mbu Motane nde, bókatisa yango, mpo bókota na bilíkí, mpo na kokabola bango na bamekoli oyo bazali komeka komekola bango, kozanga kokatama ngenga.

<sup>144</sup> Oh, yango nde ekotisaki mobulu. Bango nyonso bakufaki na bil. . . to na—na kati ya mbu mpenza, Fálo ná mampinga na ye. Bamonaki bato kotambola na Nguya na kokamwa, bongo balandaki bango sima-sima pe bamekaki komekola yango, kozanga ete bázala kati na lipamboli yango. Nsima na yango, bakufaki. Ezali bokokanisi ya mosuni.

<sup>145</sup> Moto oyo azali komeka kosala bongo, oyo azali komeka komekola eloko moko, azali nde kosala bokokanisi ya mosuni, ya Moklisto oyo ya solosolo.

<sup>146</sup> Ndeko na ngai ya Indien wana, ayebi yango. Soki okómi na Bombay okomona bato kuna, ba-Hindú ná bamosusu, ndenge balálaka likolo na biloko ya songe pe likolo na. . . batambolaka likolo na milangi pe—pe batambolaka na kati ya móto, mpo na kolakisa makoki na bango, ná makambo ya lolenge. . . Oyo wana ezali bomekoli ya mosuni, ya moto oyo azali mosika na kati ya zamba, azali kosala bongo mpo na komipesa mbeka epai na nzambe na ye.

<sup>147</sup> Tomonaka yango na bomoi ya ba-losambo nyonso, bomekoli ya mosuni, moto oyo azali koluka kokóma lokola moto mosusu. Ndakisa ezali bobele moko, oyo bosengeli kolanda, ezali nde kozala lokola Yesu Klisto, Oyo azalaki Liloba. Na bongo, soki Liloba na Nzambe eyei epai na yo, ekozala ndenge moko.

<sup>148</sup> Kasi, ata bongo, Nzambe akambaki bango kino na mboka na elaka. Bamonaki, pe, bibombelo nyonso ya mai, ntango babandaki koleka na bilíkí, na mobembo na bango, nsima na bango kokabwana, bamonaki ete bibombelo nyonso ekaukaki, mpo na bango.

<sup>149</sup> Okomona pe ndenge moko, ndeko, soki obandi mobembo oyo kino na Mboka na elaka. Okomona bikuke ekangami. Ndenge elenge motei wana alobaki, ya lingomba Anglikan, to soki ya lingomba nini, pe, na mbala moko, lingomba na



bango ebenganaki ye. Bomoni, lokola azalaki na bato mingi oyo bazuaki Molimo Mosantu, likambo esukaki wana.

<sup>150</sup> Pe—pe Yisalaele bamonaki ndenge moko, lokola bandakisa, na mobembo na bango kino na mboka na elaka. Bibombelo nyonso ekaukaki. Iyo, mobembo na bango na botosi ya Liloba na Ye ya elaka, na mobembo na bango, bamonaki ete bibombelo na bango ekaukaki. Na bongo, bamonaki ete bakokaki lisusu kotalela ebombelo—bibombelo yango te, mpo na mobembo na bango.

<sup>151</sup> Pe soki olingi kosala mobembo na botosi ya Liloba na Nzambe, bongo okómi komeka kokota na *oyo* pe kokota na *oyo kuna*, okomona ete ata ebombelo moko te na mokili ekoyikela Yango mpiko. Ata moko te. Ozali moto yo moko. Nzambe akambaka yo kaka ndenge Alingi kokamba yo. Boye, tomoni pe ndenge moko lelo, pe bibombelo nyonso ekauki.

<sup>152</sup> Kasi bilaká ezalaka ntango nyonso sembo, mpo na Nzambe Oyo alingaka kotosa bilaka oyo Apésá na libota na Ye. Alakáká ete Akoyanola na bosenga na bango nyonso, pe Asalaki yango. Na kati ya bibombelo ya mpamba, oyo ekauka, bókanisa naino; Yisalaele bazalaki komilela, na bilíkí, na mobembo na bango! Abengaki mokambi-mosali na Ye, mosakoli Mose, na mpembeni, pe Afungolaki liziba moko ya mai na bomoi, na Libanga oyo ebetami, mpo bana na Ye oyo bandimi bákufa te.

<sup>153</sup> Lelo oyo, yango ezali kotalisa ngolu, mpo na ngai. Tobongi na yango te. Ndenge tosali, ndenge tobiki, tobongi na yango te.

<sup>154</sup> Kasi Nzambe, lelo oyo, ndakisa, kaka awa na ntongo oyo, bótala, mpo na ba-Methodiste, ba-Batiste, ba-Presbiterien, ba-Katoliko, ná mangomba nyonso, Afungoli Liziba. Baebele 13 etalisi yango polele, ete Azali ndenge moko lobi, lelo, pe libela. Na bongo, e—ekokisi Yoane 3:16: “Mpo Nzambe alingaki mokili na motindo boye ete Apesaki Mwana-na-likinda na Ye ete moto na moto oyo akondima Ye abebisama te kasi ete azala na Bomoi na seko.”

<sup>155</sup> Pe etómbwanaki na ntina ebele, mpo libota ekómaki koyimayima pe kosumuka, banyoka ekómaki koswa bango pe bazalaki kokufa; mpo na bolimbisi na masumu na bango, pe mpo na lobiko na bokono na bango.

<sup>156</sup> Ezali Liziba yango kaka nde efongwameli biso lelo, mpo na lobiko na biso pe mpo na kobikisama na biso, kobikisama na nzoto. “Mpamba te Azali ndenge moko lobi, lelo, pe libela.”

<sup>157</sup> Pe ntango Libanga oyo ebetamaki na Liloba na Nzambe oyo elakamaki, ntango motindo epesamaki, Ezalaki kobimisa mai mingi ya peto pe ya kitoko; oyo—oyo ebébá te, oyo ezali na mikolóbe te, kasi Bozali na Nzambe Mpenza. Mai ya peto, pe ebikisaki baoyo nyonso bamelaki yango. Nzoka nde, toyebi ete ezali ya solo, mpo ete totangi yango na Kondimana ya Kala, lokola elilingi.

<sup>158</sup> Nzoka nde, ezalaki na ntina te ete óbéndá yango, ópompé yango, ókota kuna, ókende na kelasi ya likindo mpo óyekola ndenge basalelaka yango. Bakoyebisa bato ndenge basalelaka yango kuna, bomoni, “Oh, ee, yo, soki osílá kozua Molimo Mosantu, tondimi yango, kasi nde yo—yo salela yango *boye*.”

<sup>159</sup> Kasi, bomoni, bakonzaka yango te. Bino nde bosalelaka Molimo Mosantu te; Molimo Mosantu nde asalelaka bino, bomoni. Bomoni, bino bosengeli te, bosengeli kosalela Molimo Mosantu te; Molimo Mosantu nde asengeli kosalela bino. Likabo ezali te eloko oyo ozui, lokola mbeli, mpo na kosala na yango songe ya kreyó. Ezali nde likambo ya komitika epai na Nzambe, pe ya komilongola na nzela mpo Molimo Mosantu ákoka kosalela yo.

<sup>160</sup> Botala, ezalaki na ntina te ete bápompé to bábenda yango, to ezalaki na ntina te ete bátuna: “Basalelaka mai yango ndenge nini?” Mpamba te, bayebaki ndenge basalelaka yango. Bazalaki na mposa ya mai. Bayebaki oyo basengelaki kosala na yango.

<sup>161</sup> Ezali pe bongo mpo na mobali to mwasi, ata nini, ata soki azali mondimi ya endimeli to ebongiseli nini. Soki ayoki mposa ya Nzambe, azali na ntina ya kozonga mbangu na kelasi ya likindo te, lokola ndeko oyo ya lingomba Anglikan, to ndeko oyo ya Ngelesa, lobi na mpokwa, kosengela kozonga mpo na kotuna tolí, na lingomba Anglikan, ndenge asengeli kosalela likabo monene oyo azali na yango, ya koloba minoko na sika, pe ndenge asengeli kosala likambo *boye*. Kutu, balingaki kobengana ye. Bomoni? Azalaki na mposa, boye Nzambe atondisaki ye. Ezalaka kaka bongo. Liboso mposa, nsima nde Nzambe atondisi.

<sup>162</sup> Ozali na ntina ya kokonza eloko moko te, ete moto áyebisa yo oyo osengeli kosala na yango. Nzambe moto akambaka moto moko na moko na—na lolenge oyo Ye alingi ete ósala. Ozali moko—moko moko, yo moko. Ozali eteni na Nzambe. Moto moko te akoki kozua esika na yo. Nzela ezali te mpo ósengela kokende epai na moto moko, pe óloba ete, nakosengela “kosala na yango *boye*,” to nasengeli “kosala na yango *boye*.” Te, misie. Nzambe asalelaka yango ndenge oyo—oyo Ye alingi. Soki oyoki mposa, okoyeba komela na ndenge ekoki.

<sup>163</sup> Pe soki ozali na mposa na ntongo oyo, melá mai na Yango, yango nde nyonso oyo osengeli kosala. Nzambe asiláká kobongisa nzela mpo na mposa na bango, mpo bana oyo bazalaki na mposa, bámela mai na Ye mpenza ya ofelé. Nzambe asílá pe kobongisa nzela mpo na mobali pe mwasi nyonso, oyo azali na nzela pe na mposa na ntongo oyo. Ntango mosusu bato bazali awa, oyo babikisami naino te. Bato mosusu bazali awa, oyo bakómi pene na kobikisama.

<sup>164</sup> Bato mosusu bazali awa, bafandi awa lokola bandimi ya mangomba, bozalaka na mposa ya kosala bolamu, kasi bozali

komela mai na bibombelo. Bakoyebisa bino ba-Solo oyo ata mokolo moko te.

<sup>165</sup> Eloko bobele moko, mpo na koya, ezali ete ózua elaká na Nzambe pe óya na Liziba, nde Akosilisa mposa yango. “Moto oyo akomela na Liziba oyo, akoyoka lisusu mposa ya mai te.”

<sup>166</sup> Sikawa, botala ndenge—ndenge Akangolaki bato na Ye—bato na Ye, oyo bazuaki mai oyo, na ngolu, kasi na mimesano to na libulu ya kelasi te. Atatolaka Liloba na Ye, ezali makoki oyo epesaka Bomoi. Bato boni bazali awa, oyo bayebi ete basilá koyamba Bomoi ntango bazuaki Liloba wana pe mai na Ye, oyo bayebi mpenza ete basilá kozua Bomoi? [Losambo balobi: “Amen.”—N.D.E.]

<sup>167</sup> Tózua, ee, lokola, ndakisa moko lisusu, to mibale, nde nakosilisa, etikali moke. Na—natiaki butó yango na esika moko boye. Kasi botala. Nazali kaka kokoba koloba, kasi nakani yango te. Botala, tózua bato mibale to misato lokola ndakisa.

<sup>168</sup> Tózua mwasi oyo azalaki na libulu ya Yakobo, libulu oyo batimoláká. Azalaki wana, afandaki na ye. Ayebaki libulu mosusu te, kaka oyo wana, epai azalaki kokende kotóka mai. Pe kuna pene na libulu, uta na mwa likolo kuna, amonaki Mobali moko afandi wana, mo-Yuda. Ye azalaki mo-Samalia, ezali engumba ya Sikala. Pe tomoni ete Mobali yango, mo-Yuda yango, alobaki Liloba oyo ezalaki libanda na momesano mpo na mwasi wana, Alobaki: “Yélá Ngai mai ya komela.”

<sup>169</sup> Bongo alobaki: “Biso na bino toyokanaka te. Ebongi—ebongi te ete ótuna ngai motuna ya ndenge wana; Yo ozali mo-Yuda, ngai mo-Samalia.”

<sup>170</sup> Alobaki: “Kasi soki oyebaki Moto oyo ozali kosolola na ye, yo nde olingaki kosenga Ngai mai ya komela, pe Nalingaki kopesa yo mai oyo olingaki lisusu kozala na ntina ya koya komela mai ya libulu oyo te; ekokóma libulu ya mai oyo etokaka kati na yo.” Botala ntango amonaki ete ezalaki mpenza Solo!

<sup>171</sup> Nzoka nde, ya liboso, moto nyonso akokaki koloba bongo. Kasi mwasi yango alobaki: “Bino bolobaka ete bato basengeli kosambela na Yelusaleme, biso tosambelaka na ngómbá oyo.”

<sup>172</sup> Alobaki: “Lobiko euti na ba-Yuda. Biso toyebi oyo tondimi. Kasi,” Alobaki, “tika Nayebisa yo likambo moko mpamba,” na elobeli lokola oyo, “na ngómbá oyo te, na Yelusaleme pe te. Ntango ezali koya, wana bato bakosambela Nzambe na Molimo pe na Solo, mpamba te Tata azali koluka bato ya ndenge wana.” Alobaki: “Kende kozua mobali na yo pe boya awa.” Botala, awa nde etalisamaki polele. Esika oyo nde etalisi soki azalaki na liziba nini. Alobaki: “Kende kozua mobali na yo pe boya awa.”

Alobaki: “Nazali na mobali te.”

173 Alobaki: “Olobi solo.” Bomoni, emonanaki lokola ete ekesanaki mobimba na oyo Autaki kotuna ye, ntango Alobaki: “Kende kozua mobali na yo.”

Alobaki: “Nazali na mobali te.”

174 Alobaki: “Olobi solo.” Alobaki: “Mpamba te ozalaki na bango mitano, pe oyo ozali kobika na ye sikawa azali ya yo te.”

175 Botala mwasi yango, ndenge akesanaki na banganga-nzambe ya eleko wana! Banganga-nzambe ya eleko wana bamonaki pe likambo yango kosalema, kasi balobaki: “Ezali molimo mabe, kisoloka, to—to Belezebula.” Bomoni, basosolaki te ete Liloba elakaki yango.

176 Kasi elenge mwasi yango azalaki na boyebi ya Makomi, koleka banganga-nzambe nyonso. Alobaki: “Misie, namoni ete Ozali mosakoli. Tozui mosakoli te mibu nkama minei, uta na ntango ya Malaki. Kasi,” alobaki, “tozalaki kozela mosakoli moko, pe toyebi ete moko azali koya, Masiya. Pe ntango Akoya, Akosala nde makambo oyo.”

Yesu alobaki: “Ezali nde Ngai.” Amen.

177 Bomoni eloko moko, atikaki elokó na ye na libulu ya Yakobo, akimi mbangu kino na engumba; wana atondisami na mai ya libulu ya solosolo! Autaki komona yango kotatolama be, pe Ye nde azalaki Liziba yango ya Bomoi. Botika nátalisa bino ye. Atikaki yango; ntango etalisamaki polele ete Ye nde Liloba ya Bomoi. Atikaki yango; pe autaki kososola ete kaka Libanga yango, oyo ebetamaki na bilíki, etalisamaki polele ete ezalaki wana na ntango yango.

178 Botika náloba, kaka Nzambe oyo azaláká kala, oyo tolobelaka mingi boye, Azali awa sika-sikawa; na lisosoli ya likindo moko boye te, kasi na boyebi ya kotatolama na Ye epai ya moto na moto, ete na mikolo oyo ya suka, Akosopa Molimo Mosantu likolo na lingomba na Ye. Azali “Nazalaki” te. Azali “NAZALI” kino lelo, na eleko bébe, na ntango nyonso.

179 Bongo, libulu ezalaki lisusu na elengi te. Ezalaka pe bongo mpo na moto nyonso oyo asilá kozua nguya ya Nzambe, na libatizi ya Molimo Mosantu, mimesano ya mangomba ezalaka lisusu na elengi te. Okozala lisusu na mposa ya mai wana te, oyo ebebi na magbololo, miseleketete, banyama mikemike, ná biloko mosusu. Okómi komela na Liziba, oyo ezali na mai ya sika pe ya peto, Liloba na Nzambe, ezalaka ntango nyonso sika kati na molimo na yo. Lokola sikawa, wana Liloba etalisami polele ete ezali Solo, meká elengi na yango mpo óyeba soki ezali ya solo te.

180 Atako libulu esalaki malamumu, esalelaki ntango na yango malamumu; kasi, bomoni, Liziba ya Bomoi ezalaki wana, libulu ya Yakobo lisusu te, na oyo etali komela na molimo. Oyo bazalaki kokanisa, soki bameli mai ya libulu wana, ee, ezalaki

mabe te; kasi na ntango wana, Liziba ya Bomoï Yango moko efandaki wana.

<sup>181</sup> Sikawa tozali lisusu na ntina ya mimesano ná bibongiseli oyo tozalaki na yango te. Tokómi na ntango ya suka. Pe Nzambe alakaki, mpo na ntango ya suka oyo, makambo oyo Akosala. Pe tozali komona yango kokokisama, kokokana na Liloba. Toyoki sodá wana, ntango atelemaki, azalaki kolenga, pe bango balobaki ete: “Etikali moke likambo moko ekosalema.” Tozali koyoka Molimo Mosantu kokebisa biso ete etikali moke likambo moko ekosalema. Tozali komona biloko nyonso kotiamana na molongo. Boye, botika mimesano wana pe boya na Liziba. Iyo, misie.

<sup>182</sup> Esalaki mosala na yango, kasi na ntango yango azalaki miso na miso ná Liziba Mpenza.

<sup>183</sup> Na Yoane 7:37-38, Yesu alobaki na mikolo ya suka ya elambo ya mongombo (Alobaki nini?): “Soki moto azali na mposa ya mai, áya komela epai na Ngai.” Na kati ya bato na likindo mpenza! “Soki moto azali na mposa ya mai, áya komela epai na Ngai. Mpo Makomi elobi, uta na kati na Ye mpenza, bibale ya Mai ya bomoi ekotiyola.”

<sup>184</sup> Liziba ya Bomoï yango wana. Yango nde Liziba oyo bato batiki lelo. Bazui bindimeli, batiki Liziba ya Mai na bomoi. Botika násunga bino mpo bóyeba Ye. Ye, mpo na ngai. . . Nalingi násilisa.

<sup>185</sup> Ye, mpo na ngai, azali Liziba, oyo ebikisaki bomoi ya Agala, ná ya mwana na ye, ntango balingaki kokufa na bilíki.

<sup>186</sup> Nandimi ete Azali Libanga wana, na Yisaya 32, Azali Libanga wana, na mokili molembisami na moi. Azali ebombamelo na ntango ya mopepe makasi.

<sup>187</sup> Zakarya 13, Azali Liziba oyo efungwami na Ndako na Dawidi, mpo na masumu. Nandimi ete ezali Ye. Boye te? [Losambo balobi: “Amen.”—N.D.E.]

<sup>188</sup> Na Nzembo 36:9, Azali liziba ya Bomoï mpo na Dawidi. Azali Mai ya kimia mpo na Dawidi, pe matiti mobesu. Azali Mai pene na molúká, mpo na Dawidi.

<sup>189</sup> Na Genese 17, Azali libéle oyo Abalayama amelaki, El Shaddai. Kasi ntango azalaki lisusu na bomoi te, azalaki kaka. . . ndenge Nzambe alobaki.

<sup>190</sup> “Mobali ya mibu mokama, likambo oyo ekosalema ndenge nini? Nakómi mobange, mwasi na ngai pe akómi mobange, ndenge nini makambo oyo ekoki kosalema?”

<sup>191</sup> Alobaki: “Nazali El Shaddai.” Nzoka nde, *El* ezali “oyo,” pe—pe *Shaddai* ezali “mabéle,” Shaddai ezali na boiké, elingi koloba “Nazali Nzambe oyo azali na mabéle.”

<sup>192</sup> Lokola bebé oyo azali komitungisa pe azali kobéla, pe makasi ya nzoto esili ye, akolála na ntólo ya mama na ye pe

akomela libéle mpo na kozongisa makasi na nzoto. Solo. Ezali kaka te. . . Ntango azali komela, akomitungisa lisusu te. Na libéle ya mama, mposa na ye ekosila, wana makasi na ye ezali kozonga.

<sup>193</sup> Pe moto nyonso oyo akoyamba elaka na Nzambe na motema na ye, oyo elobi ete: “Elaka ezali mpo na bino, pe mpo na bana na bino, pe mpo na baoyo bazali mosika, ebele nyonso oyo Nkolo Nzambe na biso akobenga,” yékámélá yango pe melá libéle mpo na kozongisa makasi na nzoto. Yo mwana oyo ozali komitungisa, ndima yango! Ezali mpo na bandimi.

<sup>194</sup> Epai na moyembi oyo azali mondimi, nazali komikanisela nzembo ebele, oyo bayembi bayembeli biso. Moko na yango, kala, elobaki ete Ye. . .

Liziba moko ezali, oyo etondi na Makila,  
Oyo ekamatami na misisa ya Emanuele,  
Soki basumuki bamibwaki na kati,  
Mbindo nyonso ya mabe na bango ekolongwa.

Moyibi wana asepelaki komona  
Liziba yango na eleko na ye;  
Kuna, atako nazali mabe lokola ye, tika ete  
Nálongola masumu na ngai nyonso.

Pe, na kondima, uta namóná ebale yango  
Oyo ezali kouta na bampota na Yo,  
Bolingó oyo esikolaka ekóma lisolo na ngai,  
Pe ekozala bongo kino liwa na ngai.

<sup>195</sup> Mpo na ngai, Azali Mai ya Liloba ya Bokabwani, oyo ekabolaka yo na nyonso oyo ekesani na Liloba na Ye. Yango nde Liziba oyo ngai nandimi ete Ye azali. Iyo, misie. Ete, Ezali Mai oyo ekabolaki ngai longwa na mabulu oyo bato basali, kino na Liziba ya Mai na bomoi. Oh, moninga, nakoki bobele. . . Okoki kokoba kobakisa, mpo na oyo—oyo Ye azali mpo na biso! Azali Alifa, Omega. Azali Ebandeli, Azali Suka. Azali Ye oyo azalaki, oyo azali, pe oyo akoya. Azali Mosisá pe Mwana na Dawidi. Azali Monzoto na Ntongo. Azali Nyonso kati na nyonso mpo na ngai.

<sup>196</sup> Pe, ndeko mobali, ndeko mwasi, soki ozuá naino te e—e. . . Soki ozalaki naino komela mai ya mwa ebombelo oyo bato basali, na bomoi na yo mobimba, mpo na nini te, na ntongo ya lelo, kotika ebombelo yango pe koya na Liziba oyo?

<sup>197</sup> Tógumba motó mpo na mwa ntango moke. Wana togumbi motó. . . [Ndeko mwasi moko abandi koyemba na monoko na sika. Maloba mazangi na eteni oyo ya bande. Moto moko apesi ndimbola—N.D.E.] . . . na likanisi na ngai, kobenga bato na etumbelo. Bato boni sikawa?

<sup>198</sup> Mo—motema na ngai ekómaki likolo—likolo, na—naumisi bino mingi mpenza, esali ete nakata-kata liteya na ngai. Kasi nandimi ete Molimo Mosantu alingi ete bózuwa oyo nalingi

koloba. Bóyoka, lelo oyo, eloko ya motuya koleka komitia na molongo na Nzambe ezali te; bomoni, bilei na biso, ata soki ezali nini, ézala nini. Nkolo azali awa. Nzoka nde, nayóká likambo yango mbala soko moko mpamba na bomoi na ngai, bandá ntango yango.

<sup>199</sup> Sikawa boni. . . bino nyonso oyo bozali awa, ezali te “bato boni.” Bino nyonso oyo bozali awa, oyo alingi komela mai na Yango, átelema mwa moke, kaka mpo na libondeli. Nzambe ápambola bino. Nkolo ápambola bino.

<sup>200</sup> Sikawa bato boni bazali awa, oyo—oyo bazali awa sikawa, bakolinga koloba, wana atomboli loboko *boye*, ete: “E Nzambe, yaka epai na ngai, tondisa ngai mpenza, tika ete námela mai ya Liziba oyo. Pe nasalaki kaka bolamu te, kasi na—nalingi ete Ólimbisa ngai mpo na yango. Nalingi ete Ólongola masumu na ngai. Pe tika—tika—tika ete, bandá lelo, ngai. . .”? Bótala kaka! Oh!

Liziba moko ezali, oyo etondi na Makila,  
 Oyo ekamatami na misisa ya Emanuele,  
 Soki basumuki bamibwaki na kati,  
 Mbindo nyonso ya mabe na bango ekolongwa.  
 Mbindo nyonso ya mabe na bango ekolongwa,  
 Mbindo nyonso ya mabe na bango ekolongwa;  
 Soki basumuki bamibwaki na kati,  
 Mbindo nyonso ya mabe na bango ekolongwa.

<sup>201</sup> Sikawa, yo oyo ozali mondimi Moklisto, osílá koyamba Klisto lokola Mobikisi na yo mpenza, kasi naino o . . . Sikawa, soki naino osali yango te, Liziba yango wana. Liziba moko mpamba, oyo ngai nayebi, ezali Oyo euti na misisa ya Emanuele. Sikawa, soki mingi kati na bino oyo bozali awa . . .

<sup>202</sup> Ezali mpenza lokola nazalaki koloba mokolo wana na mpokwa na ntina na mwana na mpongo oyo azalaki kotambola na lopango ya basoso elongo na bana ya soso. Pe ayebaki eloko mosusu te, kaka bana ya soso, kasi ayebaki ete eloko moko ezalaki kati na ye, oyo bana ya soso bazalaki na yango te. Na nsima, mama na ye ayaki koluka ye, pe azalaki kobelega uta na likolo. Ezalaki mbéla ya mpongo. Bomoni, kútu, asengelaki kaka kozala mpongo, soki te, alingaki kososola mbéla yango ata moke te. Bomoni, ye . . .

<sup>203</sup> Eloko moko esengeli kozala wana, oyo ekokumba zemi, soki te, ekoki pe kobota Bomoi te. Pe soki Momboto, Liloba na Nzambe, ezali kati na yo, Molimo Mosantu azali awa sikawa mpo na kopesa Yango zemi pe kokokisa Yango mpo na yo.

<sup>204</sup> Bato boni bazali awa, oyo bazua naino libatizi ya Molimo Mosantu te, bokoki kotombola maboko? Bipai nyonso, bisika nyonso, bózala mpenza sembo, soki ozuá naino Molimo Mosantu te, pe olingi kozua Yango, tombola loboko. Ata soki ozali wapi, kokitisa loboko te, mpo na mwa ntango moke.

205 Sikawa nalingi ete, bino baoyo botelemi mpembeni na bango pe bozali komona bango, nalingi ete bótiela bango maboko.

206 Nandimi ete kaka sikawa, Molimo Mosantu akotondisa moko na moko na bino, oyo azali na mposa na Yango. Sikawa bókanisa bilei oyo bokolia kuna na cafeteria te. Tokanisa nde Bilei oyo. Oyo nde Bilei. Oyo nde Bomoi. Bomoni, oyo nde Bomoi.

207 Sikawa bóbaluka, moko na moko na bino, pe bótielana maboko. “Pe batielaki bango maboko!” Sikawa nalingi ete óbondela mpo na moto oyo otieli loboko. . .

208 Sikawa kokanisa ntango ya kobima te. Kokanisa eloko mosusu te. Sikawa, kanisa kaka ete Molimo Mosantu azali awa mpo na kotondisa moko na moko. Fungola motema na yo, bwaka mai nyonso ya libulu libanda, pe loba: “E Liziba na Bomoi, kota kati na ngai. Tondisa ngai, E Nkolo Nzambe, na bolamu pe mawa na Yo.”

209 Nkolo Yesu, Liziba oyo ekaukaka te! Nabondeli, e Nzambe, ete Ótondisa moko na moko na bango. Tika ete Molimo Mosantu ákita awa. Nabondeli, e Nzambe, ete tóbosana nyonso mosusu; ete Molimo Mosantu ákita awa, sikawa, pe ápesa biso Mai na Bomoi, ya ofelé, touti bipai na bipai. Sala yango, E Nzambe. Wana ma—mabondeli ná nzembo ezali kokoba, ekutani, Nkolo, koyeba ete ezali Bozali na Yo, Bozali na Yo ya Nzambe, tozali na mposa ya kokóma na Liziba. Tozali na mposa ya libatisi oyo ya solosolo ya Molimo Mosantu. Nkolo, bato oyo bazali kobondela mpo na Yango. Nabondeli ete, sika-sikawa, bátondisama na bolamu oyo ya Nzambe. Sala yango, E Nzambe. Yoka libondeli ya bana na Yo. Tika ete Ókita likolo na bango, tika ete Nguya na Nzambe, pe Molimo Mosantu, étondisa bango. Sala yango, e Nzambe.

210 E totondi Yo mingi ndenge Osilisi mposa na biso, mpo na Bozali ya Nzambe na nguya ya Lola, oyo azali awa! Kaka na midí oyo, Nkolo, leisa biso! Nkolo, tolingi bilei oyo euti na mesa na Yo. Leisa biso, Nkolo, sika-sikawa. Leisa biso na Molimo Mosantu, na bomoi na biso. Milimo na biso, oyo ekauki na nzala, ezali na mposa ya mai. Ndenge Olobaki na ndimbola ya loyembo wana: “Ékosopa mai na mabelé makauki.” Tika ete ésalema, Nkolo. Tika ete Maloba na Yo ékokisama na mitema ya bana na Yo: “Mai na mabelé makauki mpenza.” Nzambe na Seko, yoka libondeli ya basali na Yo, pe pesa biso Lipamboli yango. Amen.

Oh, ndenge nalingi Ye- . . .

211 Bókoba kaka kosanzola Ye sikawa. Yeba ete Molimo Mosantu azali awa. Soki ozui Yango te, ezali fóti na yo.

Ndenge nalingi Yesu,

“Olingi Ngai koleka baoyo?”

. . . nalingi Yesu,

Mpo Alingaki ngai liboso.



Oh, ndenge nalingi Yesu, (masanzoli na Nzambe!)

Oh, ndenge nalingi Yesu, (Bongo soki Ayei sikawa?)

Oh, ndenge nalingi Yesu,  
Mpo Alingaki ngai liboso.

Nakotika Ye te,  
Nakotika Ye te,  
Nakotika Ye te,  
Mpo Alingaki ngai liboso.

Yesu azali malamumu, malamumu, mpo na ngai,  
Mosungi, Nkolo na Kimia, Nzambe na Nguya nde Ye;

Oh, Abikisi ngai, Abateli ngai na masumu pe na nsoni nyonso,  
Mosikoli na ngai azali malamumu, masanzoli na . . .

<sup>212</sup> Toyembela Ye yango sikawa!

Yesu azali malamumu, malamumu, mpo na ngai,  
Mosungi, Nkolo na Kimia, Nzambe na Nguya nde Ye;

Oh, Abikisi ngai, Abateli ngai na masumu pe na nsoni nyonso,  
Mosikoli na ngai azali malamumu, masanzoli na Nkombo na Ye!

<sup>213</sup> Baoyo nyonso bazali koyoka yango, bálوبا “amen.” [Losambo balobi: “Amen.”—N.D.E.] Oh, aleluya! Namoni bato mosusu kozua Molimo Mosantu sikawa.

Kala nabungaki, sikawa namonani, kozanga etumbu,

Yesu apesi bonsomi pe lobiko na mobimba;  
Abikisi ngai, Abateli ngai na masumu pe na nsoni nyonso,  
Mosikoli na ngai azali malamumu, masanzoli na . . .

Tótombola maboko sikawa pe tósanz- . . .

Oh, Yesu azali malamumu, malamumu, mpo na ngai,  
Mosungi, Nkolo na Kimia, Nzambe na Nguya nde Ye;

Oh, Abikisi ngai, Abateli ngai na masumu pe na nsoni nyonso,  
Mosikoli na ngai azali malamumu, masanzoli na Nkombo na Ye.

<sup>214</sup> Bolingi Ye? [Losambo balobi: “Amen.”—N.D.E.] Oh, malamumu! Masanzoli na Liziba oyo etondi na Makila, epai basumuki balongolaka nsomo nyonso ya bato, etumbu nyonso, bakómaka

mpenza nsomi kati na Ye. Aleluya! Hólalá, ezali mpenza malamumu!

<sup>215</sup> Sikawa, wana tozali koyemba yango lisusu, ba-Methodiste, ba-Batiste, ba-Katoliko, ba-Presbiterien nyonso, ná bamosusu, wana tozali koyemba loyembo oyo: “*Yesu azali malamumu mpo na ngai,*” tóbáluka pe tópesana mbote ya loboko, tósala mwa búlúbulu ya malamumu na lolenge ya kala. Boyebi, ngai, nalingaka nde bongo. Tokei, tóyemba yango sikawa wana tozali kosala yango.

Oh, Yesu azali malamumu, malamumu, mpo na ngai,

<sup>216</sup> [Ndeko Demos Shakarian alobi na Ndeko Branham: “Ndeko Branham, nauti koyoka sango ya Prezidá Johnson, Lyndon Johnson abeli mpasi makasi ya motema, ntango mosusu tosendelaki kobondela mpo na ye pe mpo na ekólo na biso.” Bandede basololi na ntina na yango—N.D.E.]

Yesu azali malamumu, (ya solo)

Oh, Mosungi, Nkolo na Kimia,

<sup>217</sup> [Ndeko Shakarian alobi lisusu na Ndeko Branham: “Limbisa ngai, limbisa ngai lisusu, ókita naino mwa moke na nse?” Ndeko Earl Prickett akambi liyangani na banzembo: *Malamumu*. Maloba mazangi na eteni oyo ya bande. Liyangani bayembi *Ebale Ya Bomoi Ezali*. Maloba mazangi lisusu na eteni oyo ya bande—N.D.E.]

Biblia elobi: “Bóbondela mpo na bakonzi.”

<sup>218</sup> Tata na biso ozali na Likolo, toyei na bosenga monene mpenza mpo na mokambi ya ekólo na biso, Prezidá na biso. Ntango mosusu ayebi likambo oyo te, Nkolo, kasi Yo oyebi yango. Nabondeli mpo na Ndeko Johnson, mpo alobaka ete andimeli Yo. Pe, Tata, ndenge tososoli, mpasi makasi ya motema ebeti ye. Nabondeli, e Nzambe, ete Óbatela bomoi na ye. Kutu, ekólo na biso ezali pe koleka na li—likambo ya mpasi makasi sikawa. Pe tika ete Molimo na Yo ékita likolo na ye, Nkolo. Pe sika-sikawa, ázala na lopitalo to wapi, tika ete Molimo na Yo ékita na Lopitalo ya Walter Reed pe ésimba nzoto na ye, wana ebateli bomoi na ye. Nkolo, mobali yango azali na mokakatano, mokakatano monene, koleka oyo biso tozali kososola. Boye tobondeli, e Nzambe, lokola bandimi pe lokola eteni ya ekólo oyo, tobondeli mpo na mokambi na biso, ete Óbakisela ye mikolo, na ntango ya mpasi oyo, na Nkombo na Yesu Klisto. Amen.



*MABULU MATOBWANI* LIN65-0123

(Broken Cisterns)

Liteya oyo ya Ndeko William Marrion Branham, eteyamaki liboso na Ngelesa mokolo ya poso na ntongo, mokolo mwa 23, sanza ya yambo na mobu 1965, na boléi ya Lisanga ya Mólóngó ya Bato na Mombongo ya Nsango Malamu Mobimba na Restorá Ramada na Phoenix, Arizona, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2012 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)